

बाबा अनंत दास

(अंगिका महाकाव्य)

हीरा प्रसाद 'हरेन्द्र'



चन्द्रकांता प्रकाशन

बाबा अनंत दास/हरेन्द्र

कृति : बाबा अनंत दास

(अंगिका महाकाव्य)

कृतिकार : हीरा प्रसाद 'हरेन्द्र'

ग्राम+पो0-कटहरा

सुलतानगंज (भागलपुर) 813213

मो0-9931854246

सम्प्रति : सेवा निवृत्त प्रधानाध्यापक

महामंत्री : अखिल भारतीय अंगिका साहित्य कला मंच

सम्पादक : अंगप्रिया / मंजिल/देवायतन

प्रकाशन तिथि : 2 अक्टूबर 2020 ई0

द्वितीय संस्करण-2022 ई0

सर्वाधिकार : ©

शब्द संयोजन, मुद्रण : मोदी ऑफसेट प्रिंटर्स

व आवरण : आत्माबाजार, पहली मंजिल,
सुलतानगंज (भागलपुर)

प्रकाशक : चन्द्रकांता प्रकाशन

सहयोग राशि : 100/-

BABA ANANT DAS

By Hira Prasad 'Harendra'

बाबा अनंत दास/हरेन्द्र

3

सत्त्वा मानौं

जम्बूद्वीप आरू आर्यावर्त के नाम से विख्यात भारत भूमि आदिकाल से ही ऋषि-मुनि-ज्ञानी आरू साधु-संतों के भूमि रहलें छै। यहाँ देवी-देवता ही नै, समय-समय पर ईश्वर के अवतार होलें ऐलें छै। जन-मानस में संतुलन बनैनें राखे लेली महात्माबुद्ध आरू महावीर भारत के एक भाग बिहार में अवतरित होलें छै, तें बिहार के एक भाग में जे अंग देश के नाम से जानलें जाय छै वहाँ बाबा अनन्तदास आरू महर्षि मेंहीं अहिनों सन्त अवतरित होय के अंग के गौरव बढ़ैनें छै। बाबा अनन्त दास के जन्म क्षेत्र आरू कार्य क्षेत्र तें अंग क्षेत्र ही छेकै, मगर भ्रमण क्षेत्र अंग से बाहर भी रहलें छै, जहाँकरों लोग इनको सुधारवादी उपदेश से पूरा लाभान्वित होलें छै।

आय प्रलय होय जाय। धरती के जड़-चेतन साथे आविष्कारिक, चमत्कारिक हर चीज विनष्ट होय जाय। ईश्वरी सत्ता के प्रभाव से द्व-चार-दस सौ योजन पर सृष्टि के संचालन लें एक-आध आदमी बची जाय। कहीं कोनों ग्रंथ दबलें-चपलें रही जाय। सृष्टिकर्ता, पालनकर्ता, संहारकर्ता ब्रह्मा-विष्णु-महेश-त्रिदेव के चक्र चलै आरू धरती पर फेनू मानव के विस्तार होय जाय। कहीं धरलें उसारलें किताब में पढ़ै के मौका मिलै कि बीसवीं सदी में लोहा के जहाज आकाशों में उड़ै रहै। ई सब पढ़ी के लोगों के अन्धविश्वास रंग लागतै जेना रावण के पुष्पक विमान के वारें में शंका जतैलें जाय छै। जन-समुदाय सोचतै कि एगो सूई नै पानी में तैरे पारें, नै आकाशों में उड़ें पारें, भला लोहा के जहाज आकाशों में केना उड़तै। हमरा-तोरा आगू बितलें, आँखी देखलें सब सच गप्प रंग लागतै। ठीक वहीना अनन्त बाबा के चमत्कार अजबे रंग लागतै जेना घनघोर जंगल में बाघों पर सवार होय के भ्रमण करना, गंगानदी पैदल पार करना, सौ कोश के दूरी घंटा भर में तय करना, गंगा माय से घी-तेल भंडारा

बाबा अनंत दास/हरेन्द्र

लेली पैचों माँगना आरू फेनूँ वापस करी देना, ई सब लोगों के गढ़लों गप्प लागतै, मगर अनन्त बाबा के ई सब करिश्मा आँखी देखलका लोग अभियो मौजूद छै। अनन्त बाबा तें खाली रास्ता बताबै कि महायज्ञ में उमड़लों भीड़ लेली भंडारा के व्यवस्था तेल—घी बिना चरमराय छौ तें गंगा से पैचा माँगी लान। भक्त गण जाय के गंगा से अर्ज करै आरू तीन भरी जल लें आबै। ऊ जल तेल—घी रंग लागै आरू ओकरे काम करै। ई देखलों आरू भोगलों सत्य के कैसें कोय झुठलैतै। अनन्त दास के पुण्य तिथि उन्नीस नवम्बर उन्नीस सो सैतालिस के पूर्व उनका से मिललों—जुललों व्यक्ति के अब तक होना भी कोय अनहोनी नै लागै छै।

गरम जल के झरना लेली मशहूर ऋषिकुण्ड के पावन भूमि के संत, अंगधरा धामों के गौरव बाबा अनन्त दास के स्मृति के ताजा बनैनें राखै खातिर उनके भक्तगण के विशेष आग्रह पर जहाँ—तहाँ से उनको कथा—कहानी पढ़ी—सुनी प्रबंध काव्य के रूप में परोसे के हमरो प्रयास कहाँ तक सफल रहलै ई पाठक ही बतैतै। अनन्त बाबा के व्यक्तित्व के बखान में जे शब्द के प्रयोग करलियै कदाचित एकरा से भी ज्यादा व्यक्त करै वाला कोय शब्द मिलतियै तें ओकरो प्रयोग करतियै, मगर ऊ शब्द ही नै सूझै छै।

बाबा अनंत छेलै अनंत, कथा अगर जो गैबै,
उनको बढ़िया उपदेशों के, जीवन में अपनैबै,
हमूँ रोचक कथा—कहानी, अंगधरा धामों के
पढ़बै—गढ़बै—लिखबै आरू पाठक आगू ऐबै।

—हरेन्द्र

बाबा अनंत दास/हरेन्द्र

॥समर्पण॥



बाबा अनन्त दास के परम सेवक,
नेपाली-घुघली-आमासी उच्च विद्यालय के संस्थापक
स्व० हरि प्रसाद मंडल औ अनन्तदास कुलोत्पन्न वैष्णवी
एवम् धर्मपारायण माता जागेश्वरी देवी के संतान,
सुयोग्य, कर्मठ, वाक्पटु, कुशल अध्यापक, समाज
सेवी, परोपकारी, आध्यात्मिक चर्चा आरू सत्संग प्रेमी,
देश के धार्मिक-स्थलों के दर्शनाभिलाषी आरू प्रकृति के
चितेरे श्री राजेन्द्र प्रसाद मंडल जी के अपनों
प्रबंध काव्य के अष्टमपुष्प
“बाबा अनन्त दास” समर्पित।

—हरेन्द्र



आभार

आयकों परिप्रेक्ष्य में अनुवाद एक अपरिहार्य सामाजिक आवश्यकता बनी गेलों है। दिन पर दिन एकरों बर्चस्व बढ़लें जाय रहलें है। अनुवाद के माध्यम से खाली भाषा के अन्तरण नै होय है बल्कि संस्कृति के अन्तरण होय है। यै लेली अनुवाद के सांस्कृतिक राजदूत के भूमिका निभाबे पड़े है। यै में कोय सदेह नै कि अनुवाद के माध्यम से भारतीय साहित्य आरू संस्कृति के वैश्विक स्तर पर पहुँच आरू पहचान मिललें है। विश्व साहित्य भी भारतीय भाषा में अनूदित है। भारतीय भाषा के बीच सांस्कृतिक आदान-प्रदान भी अनुवाद के माध्यम से होय रहलें है।

कन्नड़ भाषा-भाषी संतों के वचन अंगिका में अनुवाद करलें “वचन अंगिका” देखलियै, पढ़लियै आरू चिन्तन-मनन करलियै। अनूदित करै वाला के श्रेणी में श्री हीरा प्रसाद ‘हरेन्द्र’ के नाम देखी जे खुशी होलै, ओकरा शब्द में समेटना मुश्किल पड़ी गेलै। हीरा प्रसाद ‘हरेन्द्र’ से एक दसक के मेल-जोल उनका ऊपर कुछ भार दै लें मचली उठलै।

मोर्निंग वाक के बाद एक-आध घण्टा पेंशनर कार्यालय में बैठला पर जे ‘हरेन्द्र’ द्वारा विभिन्न विषय पर चर्चा सुनै छियै, ओकरों खुली के प्रशंसा तें करथें छियै साथे इनको याददास्त के भी दाद दै छियै। हीरा प्रसाद ‘हरेन्द्र’ के वक्तव्य, गप-शप आरू बोलै के प्रभावपूर्ण शैली के कसौटी पर कसला से कसौटी के महत्व कम हुवे लागै है।

सर्गबद्धता, छांदस विधान, रससृष्टि, भाव वैविध्य, भाषा गांभीर्य आरू उद्देश्य महनीयता के साथे रचलें कोय भक्तिभाव भरलें, कोय दलित आरू नारी विमर्श पर, कोय क्षेत्रीय महात्मा तें कोय लोक गाथा पर आधृत सात-सात प्रबंधकाव्य भी देखी चुकलें छियै। इनको कार्य शैली आरू कार्य कुशलता से प्रभावित होय के हममें आपनों लोभ के संवरण नै करे पारलियै। जोन अंग क्षेत्रीय “महर्षि मेंहीं” पर इनको महाकाव्य देखलियै उनका से सैंतीस-अड़तीस वर्ष पूर्व यही अंग के पावन धरती पर अवतरित बाबा अनन्त दास के व्यक्तित्व-कृतित्व पर ‘हरेन्द्र’ जी से कुछ लिखवाबै के मोन बनलियै। ‘हरेन्द्र’ जी सहर्ष भार के स्वीकार करलकै आरू परिणाम आज आगू में है।

महर्षि मेंहीं बाबा से सैंतीस-अड़तीस वर्ष पूर्व बरियारपुर (मुगेर) के राजदीक कल्याण टोला में एक साधारण किसान परिवार में झौरी दास

आरू गंगावती देवी के पाँचवाँ पुत्र के रूप में बाबा अनन्तदास महाराज के अविर्भाव होलें छेलै। महापुरुष में जन्म के समय से ही कुछ विलक्षणता लोगो के झलकै लागै छै। कोय-कोय के माथा में जट्टा, कोय के मुँहो में बतीसो दाँत, कोय के ठेहुना से नीचे तक हाथ अद्भुत दृश्य प्रस्तुत करै छै, वही ना बाबा अनन्त दास के ललाट में तिलक जैसनों रेखा माय-बापों के कुछ से कुछ सोचै लें बाध्य करै छेलै। पढ़लें पाठशाला में नाम लिखैला पर-

“राम-नाम लड्डू गोपाल नाम घी,
हरिनाम मिसरी घोल-घोल पी।”

गीत गाबै वाला प्रल्हाद के तरह अलग कुछ धुन गैतें रहै छेलै। उनको विवाह भी वाल्यावस्था में होय गेलो छेलै। द्विरागमन यानी गौना के समय हुनी दुनियादारी समझें लागलें छेलै। दाम्पत्य जीवन के जाल में नें उलझी के हुनी बैराग्य धारण करलकै। बाबा नें तें तिलस्मी वाला नें जादूगर छेलै आरू नें तें तंत्र-मंत्र वाला छेलै, मगर असंभव के संभव, अनहोनी के होनी करी दै के क्षमता उनका में ईश्वर प्रदत्त छेलै। बाघ के सवारी करना, बाघ के साथे रखना आरू ओकरा पैर के काँटों निकालना, हर तरह के समस्या के समाधान करना भंडारा लेली गंगा से घी पैचा माँगना, गंगा पैदल पार करना आदि विचारवान व्यक्ति के मन-मस्तिष्क में ही समैतै। उनका साथ घूमैवाला, रहै वाला व्यक्ति से ई सब कहानी हमरा सुनै के मौका मिललें छै, यै लेली कहानी वास्तविकता से जुडलें हममें महसूस करै छियै।

बाबा अनन्त दास से हमरो तीन पुस्त के करीबी सम्पर्क रहलें छै। हमरो बाबा त्रय (नेपाली, अमासी, घुघली) के बाबा के अनुयायी कहना अतिशयोक्ति नें होतै।

जब श्रीराम जानकी गंगोत्री ठाकुरबाड़ी, साहेबगंज (नाथनगर) के निर्माण लेली बाबा में धुन समैलै, इलाका के गणमान्य लोगो से मिली विचार-विमर्श के बाद चन्दा-चाटी करलें गेलै। चन्दा के पैसा गामों के प्रतिष्ठित व्यक्ति नेपाली मंडल के पास जमा करलें गेलै। जमा पैसा से राम-जानकी नाम से जमीन खरीद के बात छेलै। कुछ अपरिहार्य कारण से राम-जानकी नाम से निबंधन संभव नें हुवे पारलै। नेपाली मंडल अपना नाम से निबंधन करबाय लेलकै। चार वर्ष तक ऊ जमीन के फसल के भोगलकै। निबंधन के रास्ता साफ होला पर नेपाली मंडल चन्दावाला पैसा से खरीदलें अठा

बीघा आरू फसल के मुआवजा रूपों में चार बीघा, कुल बाइस बीघा जमीन श्रीराम-जानकी गंगोत्री ठाकुरबाड़ी, साहेबगंज के नाम से निबंधन करी देलकै।

श्री राम-जानकी गंगोत्री ठाकुरबाड़ी के निर्माण लेली एक समिति के गठन होलै। संगठन के सक्रिय सदस्यों के रूपों में हरि मंडल के नाम आदर से लेलें जाय छै। सौभाग्य के बात कि हममें राजेन्द्र प्रसाद मंडल उनको आत्मज अभी भी बाबा के भजन-भाव में लगलें-भिडलें रहै छियै।

श्री हिरा प्रसाद 'हरेन्द्र' जी अंगिका के चर्चित साहित्यकार छेकै। इनको अथक प्रयास से बाबा अनन्तदास अंगिका महाकाव्य के रचना सराहनीय छै। काव्य के विभिन्न कोटि के साहित्य में उल्लेख छै। आलोचक एकरा खण्डकाव्य, प्रबंध काव्य, सम्पूर्ण काव्य, महाकाव्य आदि नामों से वर्गीकृत करने छै। ग्यारह सर्ग में विभक्त ई महाकाव्य में विभिन्न छन्दों के प्रयोग होलें छै। पर्वत-पठार, गंगा-जलाशय, जंगली परिवेश, प्रकृति वर्णन, विभिन्न नक्षत्र-ऋतु, संभव-असंभव, तथ्यों के समावेश जहाँ तक काव्य के लक्षण बूझै-समझै छियै, वहाँ तक इनको काव्य में पाबै छियै। हरेन्द्र जी गीतकार, गजलकार, कहानीकार, नाटककार, उपन्यासकार आदि के रूपों में जानलें जाय छै। दस साल से अधिक के निकट सम्पर्क कोय व्यक्ति के समझ में पर्याप्त अवसर प्रदान करै छै। मगर वहीं कठिनाई पैदा होय छै कि इनका बारे में कोन रेखा के मोटों करी के देखियै।

बहुत कम व्यक्ति ऐसनों होय छै कि अपना में कई ठो गुण समेटने रहै छै। कई ठो गुणों के अपना में समैने रखना हुवे पारै नैसर्गिक होतै, मगर ऊ सब में संतुलन बनैने रखना वास्तविक में व्यक्ति के नीजी प्रतिभा छेकै।

हरेन्द्र जी रामायण, महाभारत आरू पुराणों के दबलें-चपलें, गडलें तथ्यों के लोगो के बीच परोसी के बहुत कुछ सोचलें बाध्य करी दै छै। सर्वतोमुखी प्रतिभा के धनी हरेन्द्र जी के साहित्य-साधना के हममें नमन करै छियै आरू चाहै छियै कि शताधिक वर्ष तक रचना धर्मिता के आपनों सत्प्रयासों से साहित्य के आरू समृद्ध करतें रहें। बाबा अनन्तदास, अंगिका महाकाव्य के रचना लेली हममें आभार प्रकट करै छियै।

—राजेन्द्र प्रसाद मंडल

दुधैला (काली स्थान), सुलतानगंज (भागलपुर)

Mob.: 7661692152

हर सर्ग के निचोड़

- पहला सर्ग : भारत महिमा, भारत के प्रकृति, अंग के देवस्थान, विषय प्रवेश, चमत्कारी अनन्तदास।
- दूसरा सर्ग : अनंत बाबा के जन्म, जन्मस्थान, तिथि, पारिवारिक वर्णन, नामाकरण—ऐतबारी तबें ऐता, विवाह पत्नी चौरिया, ऐतादास के संन्यास ग्रहण करना, पत्नी पर प्रभाव, पति के परमेश्वर मानी समय काटना।
- तीसरा सर्ग : प्रकृति प्रकोप, बाढ़ समस्या, ऋषिकुण्ड में डेरा, गुरु के दर्शन, चंचल बाबा के आशीर्वाद।
- चौथा सर्ग : जंगलवासी के बीच हैजा, बाबा द्वारा शांति, ऐतादास के दीक्षा, नाम परिवर्तन अनन्त बाबा।
- पाँचवाँ सर्ग : ऋषि कुण्ड के महिमा, मलेमास में मेला, अनंत बाबा के बाघ सवारी।
- छठा सर्ग : बाबा के सवारी बाघ के निधन, माता—पिता गुरु के स्वर्गवास, देश—विदेश भ्रमण, बरियारपुर में ठाकुरबाड़ी, राधे साह के इलाज, झौबा बयिहार में यज्ञ, बुढ़वा दीरा में यज्ञ।
- सातवाँ सर्ग : अजगैवीनाथ दर्शन, आगू जाना परबत्ता, मल्लाह के आनाकानी, बाबा के पैदल पार होना, परबत्ता में यज्ञ, औरत के वार, बाबा के उपचार, औरत कुष्ठ रोग से ग्रसित, रूद्रयज्ञ, घी के अभाव, गंगा से घी प्राप्त, क्षण भर में पीरपैती से ऋषिकुण्ड, बाबा से राजेन्द्र बाबू के भेंट, आजादी के आशीर्वाद।
- आठवाँ सर्ग : ऋषिकुण्ड के महिमा, प्रकृति दृश्य, कुआँ के निर्माण, पानी के अभाव, कमलामहारानी की कृपा, मेंहीं दास से मिलना
- नौवाँ सर्ग : ठाकुरबाड़ी लेली बाइसबीघा जमीन, बजरंगवली के करिश्मा, मंदिर लेली जमीन, मंदिर के निर्माण, यज्ञ भवन,
- दसवाँ सर्ग : रामजानकी गंगोत्री ठाकुरबाड़ी में यज्ञ, राधोपुर में यज्ञ, महादेवा में ठाकुरबाड़ी, सुलतानगंजघाट के मल्लाह, बाबा पैदलपार, मल्लाह के फेर, कालीमाय वैष्णवी, बलिदान पर रोक, बाबा द्वारा भंडारा, बाबा के स्वास्थ्य गिरना, पत्नी के हालत खराब, मिलन, बाबा हाथ से पानी पीबी स्वर्गवास।
- ग्यारहवाँ सर्ग : बाबा के रूग्नावस्था, पूर्णिमा के दिन देह त्याग, काशी के पंडित श्राद्धकार्य में, जमुनादास के महंथी, बाबा के उपदेश जीवन में उतारना।



सर्ग—एक

जग में ज्ञान—किरण छिटकाबै,
सगरे जकरो छै सम्मान।
सबमें जानै, सबमें मानै,
हमरो भारत देश महान ॥ १ ॥

सिर पर मुकुट हिमालय शोभै,
नीचें जलधि पखारै पाँव।
यै बीचों में अस्सी प्रतिशत,
बसलें झलकै खाली गाँव ॥ २ ॥

गामों के ई देश हमेशा,
बीचों में गंगा घहराय।
तीन तरफ से तीन समुन्द्र,
घेरी के हरदम लहराय ॥ ३ ॥

ब्रह्मपुत्र, कृष्णा, काबेरी,
जमुना सार्थे कोसी, सोन।
सरस्वती चाहें बागमती,
कम लागै ककरा से कोन ॥ ४ ॥

नदी स्वर्णिखा कें जानों,
करनें छै जे सोना दान।
सब्भै जानै, सब्भै मानै,
हमरो भारत देश महान ॥५॥

हमरो भारत भू पर झलकै,
घौनों जंगल कहीं पहाड़।
कहीं बाघ, मृग, भालू, चीता,
ओयझैं सुनों सिंह दहाड़ ॥६॥

देखैलें कन्हों—कन्हों, मिलथौं,
करिया बंदर, उजला मोर।
कौवा, मैना, बगुला, बगरों,
चातक कहीं मचाबै शोर ॥७॥

हंस, कबूतर, चील, बाज छै,
सुग्गा केरों टेढ़ों लोल।
आमी के गाछी पें सुनभें,
कोयल के बोली अनमोल ॥८॥

रंग—विरंगा तितली, भौरा,
फूलहौ के भरलों मुस्कान।
सब्भै जाने, सब्भै मानें,
हमरो भारत देा महान ॥९॥

भारत देशों में शोभै छै,
कर्णों केरों अंग प्रदेश।
जौनें फैलैनें छै सगरे,
विश्व—बंधुता के संदेश ॥१०॥

रहै चित्ररथ राजा नामी,
रोमपाद हुनिये कहलाय।
चम्प नाम उनको परपोता,
सुन्दर चम्पा नगर बसाय ॥११॥

जे चम्प के खानदानों में,
जन्मै अधिरथ नामक सूत।
उ पावै गंगा में पिटारी,
जै में सुतलों कर्ण सपूत ॥१२॥

अधिरथ—राधा पालै—पोसै,
कोन्तेय राधेय कहलाय।
दुर्योधन जकरा माथा पर,
अंगों केरों तिलक लगाय ॥१३॥

कर्ण करै सावा मन सोना,
अपनों हाथें रोजे दान।
दानी अंगराज कर्णों के
करै छियै हम्मों गुणगान ॥१४॥

सही अंग उत्तंग धरा पर,
करै अथर्व भेद भी गान।
ऐतरेयं, गोपथ ब्राह्मण भी,
अंग-बंग से नैं अनजान ॥१५॥

मधुसूदन, मंदार मथानी,
यहीं बसै छै चण्डी माय।
सुलतानगंज में अजगैबी,
भोला बसै देवघर जाय ॥१६॥

गोनूबाबा केरौ महिमा,
बोली मनमा कहाँ अघाय।
साँप कटलका आबी-आबी,
लौटी हँसी-खुशी से जाय ॥१७॥

ऋषि कुण्डों में ढेरी तपस्वी,
करनें ऐलै साधन-ध्यान।
मलेमास में ऋषि कुण्डों के,
मेलदेखी सब हैरान ॥१८॥

गंगा स्वरगो से उतरी के,
चलली धरती पर इठलाय।
अंग क्षेत्र में ऐथै गेले,
उनको सब सुध-बुध भुतलाय ॥१९॥

ऋषि जहनु रहै ध्यान लगैनें,
उनका से गेली टकराय।
धारों साथे पोथी-पतरा,
सम्भे दै छै दूर भसाय ॥२०॥

हलचल से जब ध्यान टूटलै,
लेलक गंगा उदर समाय।
छटपट-छटपट करै भगीरथ,
आबे करियै कौन उपाय ॥२१॥

सुनी भगीरथ केरौ दुखड़ा,
मुनिवर गेलै कुछ घबड़ाय।
चीरी जंघा तुरत निकालै,
गंगा गेली तब शरमाय ॥२२॥

ऋषि-मुनि केरौ ई धरती पर,
समय-समय पर आबै सन्त।
ऊ संतों केरौ श्रेणी में,
गिनती में छै दास अनंत ॥ २३॥

चमत्कारी अनंतदास के,
अंग क्षेत्र में पूरा नाम।
हुनको गौरव गाथा अभियो,
चर्चा में छै ग्रामे-ग्राम ॥२४॥

किवदन्ती के बात यहाँ नैं,
 आँखी देखै वाला लोग।
 अभियो तक मौजूद धरा पर,
 एक यहाँ छेकै संयोग॥२५॥

महेन्द्र नारायण शरण लिखै,
 ढेरी ऊ सज्जन के नाम।
 जे बाबा के आगू-पाछू,
 घूमी देखै अद्भुत काम॥२६॥

मूहाँमूहीं सुनलौं गाथा,
 उनका आगू में छै ढेर।
 दूर-दराजों के नैं गप छै,
 नैं ये में कुछछू अंधेर॥२७॥

अनुमानित इतिहास यहाँ नैं,
 तोरों-हमरो घर के बात।
 छन्दबद्धता के घेरा में,
 लिखौं कथा जे छै विख्यात॥२८॥

अनंत बाबा अनंत छेलहो,
 कथा भला की होतै अन्त।
 जो भटकों तैं राह दिखाबों,
 मन-मंदिर में बसलौं सन्त॥२९॥



सर्ग-दू

सुलतानगंज अंग क्षेत्र के,
 छै जग में विख्यात।
 विश्वप्रसिद्ध श्रावणी मेला,
 सावन भर दिन-रात॥१॥

मुगैरों के पावन धरती,
 पूजौं चण्डीमाय।
 ऋषिकुण्डों के झर-झर झरना,
 दै छै रोग भगाय॥२॥

ई तीनों जग्घों के बीचें,
 गंगा के नजदीक।
 बढिया गाँव कल्याण टोला,
 जे अभियो रमनीक॥३॥

वै गामों में एक सितारा,
 चमचम चमकै आय।
 सुनलौं जकरो कथा-कहानी,
 यहाँ लिखै छी भाय॥४॥

आशा टोला, नयाछावनी,
नीरपुर एक गाँव।
महदेवा भी हाट लगै छै,
सटले वोही ठाँव ॥५॥

अठारह सौ सैतालीस के,
शुभ अक्टूबर माह।
वर्षा-पानी सें सबलोगें
पैनें छेले थाह ॥६॥

तारीख दू एतवार रहै,
बजलै बारह ठीक।
झौरी दासों के घर जन्मै,
बालक जे निर्भीक ॥७॥

गंगावती दिखाबै सबकें,
बोलै झौरी दास।
बड़ी भाग्यशाली माता तों,
हमरा अब विश्वास ॥८॥

पुत्र पाँचवाँ मातु-पिता के,
पंचतत्व के रत्न।
बालक करों, सुख-सुविधा लें,
होतें रहलै यत्न ॥९॥

बालक जखनी कानै छेलै,
भजन सुनाबै माय।
मुँह देखी-देखी मैया के,
बालक दै मुस्काय ॥१०॥

बड़का भैया शुक्ल दास जी,
करै माय सें अर्ज।
नूनू केरों नाम धरै के,
हमरे छेकै फर्ज ॥११॥

माता सुनथें हर्खित होली,
छौ तोरो अधिकार।
तोरा सें बेशी नूनू कें,
के करनें छै प्यार ॥१२॥

शुक्लदास नाचै-गाबै छै,
नूनू लें कें गोद।
मातु-पिता-परिजन के आँखी,
झलकै मंगल-मोद ॥१३॥

शुक्लदास बोलै मैया सें,
दिन रहै एतवार।
'एतवारी' नाम राखै छी,
हमरों यहें विचार ॥१४॥

गदगद होलै सब्भै के मन,
माता बड़ी निहाल।
उनका आगू में नित नाचै,
पाँच-पाँच ठो लाल।१५॥

ऐतवारी कहै में मैया,
जाय रहै भुतलाय।
ऐता कहना शुरू करलकी,
सोझों जरा बनाय।१६॥

संबत उनैस सौ चार रहै,
घर में परमानंद।
रेखा ललाट पर जब देखै,
माता मुस्कै मन्द।१७॥

एतवार दिन जन्मे खातिर,
राखै ऐता नाम।
शास्त्र मुताबिक रवि ग्रह छेलै,
पावन जिनको काम।१८॥

पड़े राशि वृष मंगलकारी,
देखै जब पंचांग।
ज्योतिष शास्त्री आगू झौरी,
गिरैं तुरत सांष्टाग।१९॥

ऐता ही विद्यालय में भी,
रखलौं गेलै नाम।
प्रल्हाद रंग शुरू करलकै,
विद्यालय मे काम।२०॥

सब चटिया कें रामनाम लें,
दै छेलै उसकाय।
खेल-खेल में सब्भैं गाबै,
भजन राम के भाय।२१॥

पाठ पढ़ाबै गुरुजी जखनी,
ऐता जपै राम।
कहै राम जपों रे भैया,
बड़ा मनोहर नाम।२२॥

कतनों डाँटै गुरुजी लेकिन,
ई नैं आबै बाज।
बदली गेलै ऐता केरों,
जीवन के सब साज।२३॥

वर्ग तीसरा घीची-तीरी,
पढ़ने छेले भाय।
छप्पन से तैं हिनी चराबें
लगलै रोजे गाय।२४॥

साथी साथें गाय चराबै,
 जपै राम के नाम।
 चरबांहा सब ताल मिलाबै,
 बढ़िया लागै काम॥ २५॥
 आध्यात्मिक, धार्मिक, दैविक सब,
 भावो के रसधार।
 जिनका अंदर बहतै
 उनका खातिर सब्भे क्षार॥ २६॥
 झौरी दास पिता जब समझै,
 बेटा करों बात।
 दुनियादारी में लिपटाबै,
 सोचै तब दिन—रात॥ २७॥
 शादी करना बड़ा जरूरी,
 सोचै यहें उपाय।
 गंगावती सुनी कें चौकै,
 मन गेलै चकराय॥ २८॥
 ग्राम मोहदीपुर में पक्का,
 ठाम्हें होलै बात।
 नाथनगर अन्तर्गत छेलै,
 गाँव बड़ा विख्यात॥ २९॥

चम्पन दासों करों बेटी,
 रहै चौरिया नाम।
 जकरा साथें विवाह करों,
 होलै पूरा काम॥ ३०॥
 नाम चौरिया जे तों बूझों,
 रूप निहारी लोग।
 सोचै मनमन कतना सुन्दर,
 मिललें छै संयोग॥ ३१॥
 खूब सजाबै सखी—सहेली,
 चमकै सिनुरा लाल।
 गौर वर्ण पर कारों भौवाँ,
 कुमकुम, बिन्दी भाल॥ ३२॥
 जूड़ा करों फूल गुथलका,
 गजरा जकरों साथ।
 गोड़ों करों पायल देखों,
 पहुँची—कंगन हाथ॥ ३३॥
 बारह बरसों में ही शादी,
 चलन लगै अजगूत।
 माय—बाप करों बिरोध में,
 बोलै कहाँ सपूत॥ ३४॥

गंगा कें भी पूजै छेलै,
रोजे ऐतादास।
गण्य-माल भी खूब अघाबै,
खाय-खाय कें घास॥३५॥

जब गौना के बात निकललै,
ऐता करै विरोध।
झौरी दासों के आँखी में,
झलकै छेलै क्रोध॥३६॥

मैया कें समझाबै ऐता,
देखें जरा ललाट।
हमरा खातिर ईश्वर करों,
गेलै खुली कपाट॥३७॥

साधुवेश धारण करना छै,
छोड़ी घर-परिवार।
हम्में घर-परिवार बनैबै,
पूरा ई संसार॥३८॥

बात चौरिया देवी तक भी,
पहुँचाबै तत्काल।
सुनथें देवी झूमें लगली,
चमकें लगलै भाल॥३९॥

हमरों पति परमात्मा प्रेमी,
लेतै जब वैराग्य।
भक्तिभाव में लीन हमेशा,
ई हमरों सौभाग्य॥४०॥

थोडे दिन के बाद लाइली,
पुत्री करों पास।
शादी करों बात रखलकै,
सोची चम्पन दास॥४१॥

सुनी पिता के बात चौरिया,
आँखी भरभर लोर।
कहै पिताजी अर्ज सुनी लें,
कहै छिहौं करजोर॥४२॥

दादी सदा बताबै छेली,
नारी करों धर्म।
याद रखलियै तहिया सें ही,
हम्में सारा मर्म॥४३॥

अंधा, काना, लंगड़ा, लूल्हा,
कहिनों रहें अपंग।
प्रभु जोड़लकै नाता-रिश्ता,
जकरों जकरा संग॥४४॥

सुख-दुख में सब साथ निभाबों,
उत्तम यहाँ विचार।
अलग एकरा से नैं हम्मैं,
पति जीवन के सार।।४५।।

मांग सजैलों उनके छेकै,
उनके सब शृंगार।
कैसें भूलों बात पिताजी,
उनको सब उपकार।।४६।।

पति हमरों संन्यासी बनलै,
बनलै पूरा संत।
उनका ही आगू में होतै,
ई जीवन के अन्त।।४७।।

बात बोलतें सावन-भादों,
अहिनों बरसै नैन।
टुक-टुक ताकै परिजन मुँह से,
नै निकलै कुछ बैन।।४८।।

आगू पति परमेश्वर में ही,
रहै लगैनें मोन।
व्यर्थ ओकरा आगू लागै,
सब संपत, सब धोन।।४९।।



सर्ग-तीन

प्रकृति सदा से धरती के,
संतुलन बनाबै छै।
सब्भैं करनी करला के,
फल के पाबै छै।।१।।

कभी आपदा कहनें बिन,
आबी आफत दैथों।
कुहराम मचैनें सगरे,
लौटी फेनूँ जैथों।।२।।

बाढ़ समस्या सालों में,
देखै छी घर बैठी।
फसल लगलका आबी के,
लै छै सब्भे ऐठी।।३।।

देखी क्षति जान—माल के,
पूरा लोर बहै छै।
खेल यहेँ नियति नटी के,
सब्भे लोग सहै छै॥४॥

ऐता दासों केरों घर,
गंगा में ही सटलों।
बाढ़ों केरों पानी में,
रहलै तइयो डटलों॥५॥

मगर बाढ़ के पानी में,
पूरा मन चकराबै।
गंगा जी के मनसा तें,
जरा समझ नैं आबै॥६॥

वर्षा सावन—भादों के
कौनें थाम्ही लेतै।
कोन चूक के दण्ड यहाँ,
आय विधाता देतै॥७॥

छोड़ी केँ गाँव भागलै,
तरखों सब्भैं टेबै।
जरा ध्यान नैं खाहू के,
की—की कैसें लेबै॥८॥

ऐता दासो साथों में,
जंगल तरफें चललै।
अगल—बगल के पौधा सब,
गरमी पाबी गललै॥९॥

ऋषि कुण्डों लग आबी केँ,
सब्भैं डालै डेरा।
सूरज छिपलै बादों में,
बढ़लै तब अंधेरा॥१०॥

डरतें देखै लोगों केँ,
ऐता तब समझाबै।
ईश्वर केरों नाम जपै,
बैठी हरिगुण गाबै॥११॥

अट्ठारह सौ इकहत्तर,
ईस्वी छेलै तखनी।
चौबीस बरस के ऐता,
युवक कहाबै जखनी॥१२॥

सीताराम नाम के धुन,
होथैं रहै वहाँ पर।
गाय—माल केरों साथें,
ऐता रहै जहाँ पर॥१३॥

बड़ी अचानक एक दिनाँ,
मिललै एक महात्मा।
दर्शन पाबी ऐता के,
हर्खित होलै आत्मा।१४॥

खूब झुकी कें आगू में,
टेकै मारथो जखनी।
हारथो सें संकेत करी,
आशिष दै छै तखनी।१५॥

ऐता दासों कें चिन्ता,
बाबा सें बोलै के।
अपना दिल के बात वहाँ,
चाहै छै खोलै के।१६॥

एक दिनाँ के बात यहें,
जेरो सें कुछ फूटी।
माल—मवेशी भटकी कें,
वन में गेलै छूटी।१७॥

सब्भे चरवाहा चिन्तित,
खोजै गांग—पहाड़ें।
पर सब कें भयभीत करै,
कखनूँ सिंह दहाड़ें।१८॥

ऋषि कुण्डों दिस खोजै लें,
ऐता चललौं छेलै।
वहीं अचानक आगू में,
बाबा आबी गेलै।१९॥

जिनका खोजै में ऐता,
त्यागे अने—पानी।
उनका ऐता लग भेजै,
ठाम्हें शंभु—भवानी।२०॥

आँखी में आँसू देखी,
बाबा के मन डोलै।
काने के कारण बोलें,
बाब अपन्हें बोलै।२१॥

ऐता कहै सुनों बाबा !
गैया कुछ हेरैलै।
संध्या बेला जंगल सें,
लौटी कें नैं ऐलै।२२॥

खोजै में सब विहवल छी,
यहें दुक्ख छै भारी।
रास्ता कोय बताबो तें,
तो छेखो अवतारी।२३॥

बाबा सब जानै छेलै,
मुस्काबै छै मनमन।
ऐतां के दुख देखी कें,
बाबा बोलै तत्क्षण॥२४॥

‘चम्पाकोल’ तुरत दक्षिण,
जो तों बिना विचारे।
मेटी जैतौ जैथें ही,
जे दुख तोरा द्वारे॥२५॥

झाड़ी बीचे फसलों छौ,
जल्दी जाय निकालें।
भुखली छै आगू में तों,
खाहू लें कुछ डालें॥२६॥

दौड़ी पड़लै चरवाहा,
झटपट गाय निकालै।
हरा-भरा चारा आगू,
खाहू लें कुछ डालै॥२७॥

ऊ छेलै चंचल बाबा,
अगला दिन फिर मिललै।
ऐता दासों के मुख-पंकज,
मिलला सें कुछ खिललै॥२८॥

बाबा बोलै जल्दी तों,
अपनों घर सिधियाबें
घर वाला सें मिलीं-जुली,
खूबे मौज मनाबें॥२९॥

अगला दिन फेनूँ सब्भैं,
दूध दुही लें गेलै।
ई नाटक देखी बाबा,
तनियो खुश नैं भेलै॥३०॥

दूध जरा नैं स्वीकारै,
कहै मान समझाना।
पड़तौ जल्दी ही ऐजाँ,
तोरा कष्ट उठाना॥३१॥

बात सुनी कें बाबा के,
सब्भे घर सिधियाबै।
पर घर-द्वारी में इनका,
जरा चैन नैं आबै॥३२॥

एक दिनाँ दूध हाथ लें,
घर सें ऐता गेलै।
अबरी बाबा ऐता सें,
थोड़ा सा खुश भेलै॥३३॥

अतिशय रगड़ अनल निकलै,
हिम से भी पढ़लें छै।
ईश्वर के मरजी लँगड़ा,
पर्वत पर चढ़लें छै ॥३४॥

दूध ग्रहण कर खुशी-खुशी,
ऐता केँ समझाबै।
बाबा के कहलें मानी,
लौटी केँ घर आबै ॥३५॥

भक्ति भाव में लीन सदा,
इनकोँ मन नें मानै।
ऋषि कुण्डों केरोँ धरती,
अपनों दिस ही टानै ॥३६॥

आधो राती उठलै झूठ,
पहुँची गेलै जंगल।
चंचल बाबा केँ देखी,
झलकै मंगल-मंगल ॥३७॥

गिरै गोड़ पर बाबा के,
खुश छै चंचल बाबा।
ऐता दासों केँ मिललै,
वैठें काशी-कावा ॥३८॥



सर्ग-चार

आपदा एक पर एक यहाँ,
देखों आँख पसार।
हैजा, चेचक, प्लेग, जलजला,
सबके तीखा धार ॥१॥

ऋषि कुण्डों के अगल-बगल में,
बसलों डेरी ग्राम।
पुरुषोत्तमपुर फनूँ जबायत,
पहाड़पुर छै नाम ॥२॥

सब गामो में एकखैबारी,
हैजा के आतंक।
कननं जैभें जान बचाबें,
सगरे दलदल पंक ॥३॥

माल—मवेशी बाते छोड़ों,
गामे लागै शून्य।
काम न आबै दादाबाला,
खूब करलका पुण्य॥४॥

पचीस—तीस आदमी वहाँ,
चंचल बाबा पास।
सब्भे बारी—बारी बोलै,
अपनों दुखड़ा खास॥५॥

साहस सब्भै के चूर रहै,
आँखी भर—भर लोर।
लागै जेना कानी—कानी,
करनें सब्भै भोर॥६॥

बाबा तोरों बिना कहाँ छै,
लोगों के कल्याण।
तोरों कृपा—दृष्टि से संभव,
बचना सबके प्राण॥७॥

बाबा बोलै 'सुनें ध्यान से,
मत घबड़ाबे कोय।
होनी होईये के रहते,
ई जानै सब कोय॥८॥

अपनाँ—अपनाँ घर केँ लौटें,
राखी केँ विश्वास।
कल सेँ लौटी जैतो गामें,
नया—नया उल्लास॥९॥

निकलै बाबा मध्य रात्रि में,
होलै बाघ सवार।
सब गामो में घूमी—घूमी,
रोग करलकेँ क्षार॥१०॥

लौटी बाघों पर सेँ उतरी,
बैठै आश्रम जाय।
थकलों छेलै बाघ जरा सा,
मन गेलै भर्राय॥११॥

धानों के क्यारी में बैठै,
होलै जहाँ बिहान।
चललों गेलै पहाड़ ऊपर,
जहाँ रहै सुनसान॥१२॥

ऐता दासें देखै छैलै,
बाबा करेँ काम।
बैठी गेलों छेलै गाछी,
जखनी होले शाम॥१३॥

बड़ी सबेरे ऐलै आगू,
बाबा उगलै आग।
हमरा तोरो नैं कुछ चाही,
ई फूहड़ अनुराग।१४॥

जो जो, अपनों घर लौटी जो,
हठके करनें त्याग।
बाबा करों आँखी छेलै,
क्रोधों करों आग।१५॥

घर पर आबी एक महीना,
रहलै ऐता दास।
बुढ़वा दीरा पैरू टोला,
छेलै घर के पास।१६॥

बड़ी भयंकर हैजा उठलै,
मचलै हाहाकार।
दवा जरा भी काम न आबै,
सब लागै बेकार।१७॥

चंचल बाबा लग सब चललै,
मन में करी विचार।
बाबा ही तें काटी फन्दा,
करतै बेड़ा पार।१८॥

सब लोगों के कथा सुनलकै,
दै कें पूरा ध्यान।
'सब्भे घर जो निश्चित होतौ,
सब्भै के कल्याण'।१९॥

ऐता दास वही गाछी पर,
बैठै होथें शाम।
लेतें रहलै रातो भर,
बाबा करों नाम।२०॥

बाघों पर बैठी कें बाबा,
बुढ़वा दीरा जाय।
घूमी-घूमी सब गामों से,
देलक रोग भगाय।२१॥

आश्रम आबी चंचल बाबा,
करलक कुछ आराम।
धन्य-धन्य महिमा बाबा के,
बड़ा मनोहर काम।२२॥

भोरे उठथें बाघों करों,
देखै सब्भें पैर।
हैजा से तब मिललै राहत,
सबके होलै खैर।२३॥

बड़ा सबेरे ऐता दासें,
पकड़ी लेलक गोड़।
बाबा के क्रोधों में पूरा,
आबी गेलै मोड़॥२४॥

बाबा प्यारों से समझाबै,
घर में कर कुछ काम।
कहिनें जंगल में भटकै छे,
नितदिन सुबहो—शाम॥२५॥

बाघ, सिंह, जंगली जानवर,
खैतौ ले तों सोच।
आरू तोरा मन में की छौ,
बोलें निःसंकोच॥२६॥

कहिनें कान्हें, की दुख तोरा,
बोली ले मुँह खोल।
ईश्वर ने जे तोरा देलक,
ऊ जीवन अनमोल॥२७॥

सास्टांग दण्डवत कर बोलै,
बाबा हमरों चाह।
शिष्य बनाबों, ज्ञान सिखाबों,
उचित दिखाबों रह॥२८॥

बाबा बोलै 'घर जो पहिनें,
करिहें उचित विचार।
मुक्त गृहस्थी—घर से तोरा,
करतौ की परिवार॥२९॥

बाँकी छौ सब अभी चुकाना,
मातु—पिता के कर्ज।
साधु—संत बन दिवस गुँवाना,
तोरो नैं छौ फर्ज॥३०॥

आज्ञा पाबी मातु—पिता के,
बाबा करों पास।
बाबा करों ध्यान लगैनें,
ऐलै ऐता दास॥३१॥

सास्टांग दण्डवत कर ऐता,
बाबा के कर जोर।
बोलै बाबा शिष्य बनाबों,
काँपै कखनूँ ठोर॥३२॥

ऐता दासों से खुश होलै,
बाबा चंचल दास।
दीक्षा दै लें तत्पर बाबा,
बोलाबै छै पास॥३३॥

ऋषि कुण्डों के महिमा बोली,
तब कहै करें स्नान।
उर्द्धपुण्ड तब तिलक लगावै,
कहै करै लें ध्यान॥३४॥

राममंत्र दीक्षा प्रदान कर,
बाबा दै आसीस।
कहै भला तोरों अब करतौ,
परम पिता जगदीश॥३५॥

आजे तोरों जनम दूसरों,
बदली जैतौ काम।
'अनंत दास' राखलियौ हम्मैं,
आजे तोरों नाम॥३६॥

अनंतदास अभी सें होलैं,
घूमैं बेपरवाह।
अनन्त ब्रह्म के उपासना ही,
धन्य-धन्य छौ चाह॥३७॥

तोरो अन्दर झलकौ हमरा,
भरलों की उत्साह।
सूरज आबें डूबें चललै,
पकड़ें घर के राह॥३८॥

एक पेड़ पर बैठी गेलै,
बगलहै में चुपचाप।
रात-रात भर जागी-जागी,
करै मंत्र के जाप॥३९॥

सूरज निकलै करों पहिनैं,
बाबा करों पास।
पहुँचै छेलै ठीक समय पर,
भोरे अनन्त दास॥४०॥

गाछी पर बैठै वाला ई,
माह बीतलै तीन।
सदी बीसवीं करों किस्सा,
नैं ज्यादा प्राचीन॥४१॥

एक रात गुरु चंचल बाबा,
गेलै बाघों पास।
बाघ करै संकेत वहाँ पर,
मतलब छेलै खास॥४२॥

बाघों पीठी सवार होलै,
पूछै बाबा बोल।
की कहना छौ कन्नैं जैबें,
राज यहाँ पर खोल॥४३॥

पहुँची गेलै गाछी नीचें,
जैजाँ अनन्त दास।
ताकै ऊपर हुमड़ी-हुमड़ी,
तबेँ हुवै विश्वास।।४४।।

लेखक केरौ माथा ठनकै,
काँपै दोनों हाथ।
रोचक बड़ी कहानी लागै,
सुनों धैर्य के साथ।।४५।।

'बेटा अनन्त नीचें उतरें,
छोड़ें अब संकोच।
नैं कहियो डाँटै के तोरा,
लेनें छी मन सोच।।४६।।

नीचें जेन्हें अनन्त उतरै,
बाबा हृदय लगाय।
अन्दर गुफा चलै दोनों तब,
सिद्धी लेली भाय।।४७।।

वैराज्ञों के शिक्षा दै कें,
तीर्थाटन उपदेश।
अनन्त बाबा बातो राखी,
घूमै देश-विदेश।।४८।।

मातु-पिता-गुरुवर के आज्ञा,
जौनें सिर पर धार।
अपनों जीवन सदा बितैतै,
उनको बेड़ा पार।।४९।।

द्रोणाचार्य महा गुरुवर रइ,
घातक छै अपवाद।
एकलव्य के कथा-कहानी,
सबकें होथों याद।।५०।।

परशुराम अहिनों गुरुवर कें,
जाति-धर्म के भेद।
कर्ण शिष्य के शापित होना,
सुनथें होथों खेद।।५१।।

बापों के आज्ञा सें काटै,
माता केरौ शीश।
ई कामों सें हृदयहीन जे,
उनखौ बरतै खीस।।५२।।

पिता वचन कें मानी गेलै,
राम तुरत बनवास।
ई बातों पर बोलें सोची,
ककरा नैं विश्वास।।५३।।

पर 'रामायण' केरो पन्ना,
उलटों बारम्बार।
'राम चरित मानस' केँ खोली,
देखी लें संसार॥५४॥

राजा दशरथ कहिया बोलै,
रामों केँ ई बात।
'जाओ, वन को जाओ, मानो,
आज्ञा मेरी तात'॥५५॥

कैकेयी रङ्ग माता चाही,
हृदय करै पाषाण।
भीतर-भीतर जलतें रहली,
झेली केँ अपमान॥५६॥

निष्कलकिनी कैकेयी के,
देखों अद्भुत काम।
राम चन्द्र केँ वहीं बनाबै,
पुरुषोत्तम श्री राम॥५७॥

दुर्योधन तें खूब करलकै,
माता के सम्मान।
पर माता नैं देनैं छेलै,
कभी विजय वरदान॥५८॥

पाँचो पाण्डव केरों पत्नी,
द्रुपदसुता कहलाय।
माता कुंती बिना देखनैं,
बाँटै लें फरमाय॥५९॥

हरकामों में सोचों-समझों,
लगबों जरा विवेक।
नैं तें जंगल नसीब होथों,
होना जब अभिषेक॥६०॥

गंगा भोगै छै धरती पर,
आबी केँ अभिशाप।
भले मिटाबै छै लोगों के,
जीवन के परिताप॥६१॥

मरै शिकारी के वाणों सें,
जग के पालनहार।
साधु-संत, ऋषि-मुनि गण केरों,
महिमा अपरंपार॥६२॥



सर्ग-पाँच

तीर्थाटन गेलै बाबा, घूमै चारो धममा से,
 भगति में मनमा रमाबै सोची-सोची कें।
 द्वारिका, केदारनाथ, बद्रीका अयोध्या धामें,
 वृन्दावन घूमी-फिरी आबै सोची-सोची कें।
 प्रयाग तीरथराजें, घूमै से नैं आबै बाजें,
 त्रिवेणी में डूबकी लगाबै सोची-सोची कें।
 कन्या कुमारी सागर संगम में नाही आबै,
 रामेश्वर जाई हरसाबै सोची-सोची कें।१॥

चारो धाम घूरी बाबा, देखी आबै काशी-काबा,
 रूपवा कें अनूप बनावै बाबा जानी लें।
 बड़ों-बड़ों मूँछ-दाढ़ी, घूमी कें जंगल-झाड़ी
 जटबा के लटबा देखाबै बाबा जानी लें।
 ठैहुना सं नीचें हाथें, बालों लम्बा साथें-साथें।
 अजानबाहु तें कहलाबै बाबा जानी लें।
 रूपों-रंग मनोहारी, कामों-क्रोधें कें भी टारी।
 घर-परिवारें कें भुलाबै बाबा जानी लें।२॥
 ऋषि कुण्डें गुरुवार, बसै छेलै वहीं गेलै,

जहाँ नित पाबै छेलै गुरु के सुरतिया।
 चारो दिश खोजी मारै, नयना से लोर ढारै,
 काहीं नैं देखाबै छेलै, गुरु के सुरतिया॥
 झरना जे झरै छेलै, वोहो तें उदास भेलै,
 सबकें सुहाबै छेलै, गुरु के सुरतिया।
 बाबा ध्यान करै जहाँ, गेलै खोजें वहाँ-वहाँ,
 नजर न आबै छेलै, गुरु के सुरतिया॥३॥

कानै छै हक्कन पारी, लाल होलै आँख कारी,
 उतरै पहाड़बा से बाघ सुनों भइया।
 अनंत दासों के लग, बाघ बैठै आबी झट,
 अँसुआ बहाबै आँखी बाघ सुनो भइया।
 बाबा ब्रह्मलीन होलें, साकेत सिधारी गेलै,
 कहै छै इशरबा से बाघ सुनों भइया।
 पगड़ी से लोर पोछै, बाबा मनेमन सोचै,
 लागै समझाबै छेलै बाघ सुनों भइया॥४॥

बाब सोची-सोची बोलै, मनमा के भेद खोलै,
 कहाँ गेलै बाबा आबै बाबा के सवरिया।
 बाबा के इशारा पाबी, बैठी गोड़ों लग आबी,
 हुमड़ी-हुमड़ी देखें, बाबा के सवरिया।
 जंगल-पहाड़ कहै, बाघों के दहाड़ कहै,
 साथें साथें रहें लागै, बाबा के सवरिया।
 फल-मूल खाई-खाई, बाबा हरिगुण गाई,
 सुख-दुख साथें झेलै, बाबा के सवरिया॥५॥
 जागेश्वर दासें कहै, जे कि बाबा साथें रहै,

सुनी अचरज लागै, बाबा के कहानियाँ।
 उठे-बैठे बाघों साथें, दिन-दुपहरी रातें,
 अंतर नैं कोनों बातें, बाबा के कहानियाँ।
 झरना गरम जल, मेटी दै छै छल-बलें,
 वही रे जंगहवा के बाबा के कहानियाँ,
 मलेमास लागै जबें, ऋषिकुण्डें मेला तबें,
 मेला में सुनाबै सब, बाबा के कहानियाँ॥६॥

सब्भे दिनाँ सोमवारें, जुटै लोग बाबा द्वारें,
 धरम-करम भूमि, छेकै ऋषि कुण्डों के।
 शरण में आबी-आबी, बाबा केरों गुणगाबी
 महिमा पुरानों बड़ी, छेकै ऋषिकुण्डों के।
 सन्त एको पर एके, पहुँचै छै माथा टेके,
 जड़ी-बूटी उपकारी छेलै ऋषिकुण्डों के।
 अनंत बाबा के गाथा, अटै छै सब्भे के माथा,
 बाब के सवारी बाघें, छेकै ऋषिकुण्डों के॥७॥



सर्ग-छह

उन्नीस सौ आठ ईस्वी में,
 बाबा केरों बाघ सवारी।
 जीवन से नित लड़तें-लड़तें,
 गेलै छोड़ी स्वर्ग सिधारी॥१॥

ग्यारह तक तें अनन्त बाबा,
 करै तपस्या कुण्डों में।
 बारह में घर आबी गेलै,
 परिवारों के झुण्डों में॥२॥

तब तक झौरी दास पिताजी,
 स्वर्ग सिधारी गेलों छै।
 गंगावती कहाँ से रहती,
 स्वर्गें उनखौ भेलों छै॥३॥

चंचल बाबा केरों दर्शन,
 इनका नैं होलों छेलै।
 घर लौटी कें ऐतें-ऐतें,
 मातु-पिता सब्भे गेलै॥४॥

मातु-पिता-गुरु साथें बाघो,
 सबके करलक भंडारा।
 लागै जेना सब कर्जा से,
 इनको होलै निबटारा॥५॥

अठपहरा कीर्तन भी होलै,
बड़्डी धूमों—धामों से
एकखें बारी फुर्सत मिललै,
इनका सब्भे कामों से ॥६॥

तेरह ईस्वी में लौटै छै,
गामों दिस जंगल छोड़ी।
वैष्णव धर्म प्रचार करै में,
लै अपनों नाता जोड़ी ॥७॥

तेरह में उँगराचक आबी,
ठाकुरबाड़ी बनबाबै।
बलदेव दास उँगरचाक के,
बाबा लग पहिने आबै ॥८॥

ब्रह्मलीन थोड़े दिन पहिने,
हुनियों तें होलों छेलै।
अपनों परिजन—पुरजन बीचें,
जीवन जीवी कें गेलै ॥९॥

उन्नीस सौ बीस ईस्वी में,
पैदल पुरी पहुँचलों छै।
इनका तें जंगल—पहाड़ सब,
रस्ता—पैड़ा खुचलों छै ॥१०॥

आगू तब रामेश्वर गेलै,
पंडा जल नें ढारें दै।
पूजा खातिर धूप—दीप सब,
लें गेलों नें बारें दै ॥११॥

करलक गुरु तपस्या बाबा,
पटे बन्द बिल्कुल होलै।
लाख लगाबै मार्थों पण्डा,
तनियों टा पट नें डोलै ॥१२॥

सपना दै रामेश्वर नाथें,
वैजाँ जे तप कर्ता छौ।
उनकों माया पहिने समझें,
हुनिये कर्ता—धर्ता छौ ॥१३॥

पंडा सब बाबा कें पकड़ै,
बोलै बाबा माफ करों।
मंदिर अंदर आबै—जाबै,
केरों रस्ता साफ करों ॥१४॥

मँगबाबै सावा मन लइडू,
रामधुनी करबाबै छै।
तब बाबा अपना हार्थों से,
मंदिर खोलें आबै छै ॥१५॥

जय—जय—जय बाबा रामेश्वर,
 तोरों महिमा न्यारी छै।
 सब देवों के देव कहाबै,
 ई भोला भंडारी छै।१६॥

ई सब यात्रा देशों करों,
 सटलों देश नेपाल छै।
 पशुपति नाथों दर्शन लेली,
 बाबा बड़ी बेहाल छै।१७॥

ईस्वी तैस शुरू फागुन में,
 नेपाले बाबा गेलै।
 पशुपति नाथों करों दर्शन,
 कर बाबा पुलकित भेलै।१८॥

महारूद्र यज्ञों करवाबै,
 कीर्तन, रामधुनी, साथें।
 मंदिर बड़ा भव्य बनबाबै,
 कहीं—कहीं अपनाँ हाथें।१९॥

रामचन्द्र शिव मंदिर मिललै,
 बाबा कें तब दानों में।
 नेपाली कुछ कसर करै नैं,
 बाबा के सम्मानों में।२०॥

साईनबोर्ड जे लगबाबै,
 कहिनों छै अब पता कहाँ।
 भक्त जनों कें सदा सुनाबै,
 बाबा गोलै जहाँ—जहाँ।२१॥

नेपालों सें लौटी बाबा,
 अपनों आश्रम में आबै।
 धर्म—कर्म के बात निराली,
 अनुयायी कें समझाबै।२२॥

हुक्का पीना बन्द कराबै,
 जाल जराबै मछुआ के।
 सबकें पूरा गरियाबै जे,
 हाड़ चिबाबै कछुआ के।२३॥

मछली—मांसो, दारू—ताड़ी,
 घूमी—घूमी कें रोकै।
 जे पाखण्डी, धर्म विरोधी,
 तनियों नैं बाबा टोकै।२४॥

ऋषि कुण्डों सें घुमै—फिरै लें,
 बाबा गामों में आबै।
 मान—भाव पूरा पाबी कें,
 बाबा पूरा हरसाबै।२५॥

सोचै तब बरियारपुरों में,
 बनबाबे ठाकुरबाड़ी।
 सड़क किनारे अपना हाथें,
 साफ करै जंगल—झाड़ी॥२६॥

एक झोपड़ी मंदिर अहिनों,
 मेहनतों से बनवाबै।
 वै में छोटों—छोटों मुरती,
 पूजा लेली बैठाबै॥२७॥

एक बरस तक अनंत बाबा,
 वैठाँ समय बिताबै छै।
 राधे साह नाम के सेवक,
 एक अचानक आबै छै॥२८॥

करै आरजू—विनती पूरा,
 गोड़ों पर माथा पटकै।
 छेलै परेशान बेचारा,
 दुख—तकलीफों से भटकै॥२९॥

बाबा पूरा सुनै कहानी,
 दै छै भस्म लगाबै लें।
 मंत्र पढ़ी के जल पीयैलें,
 दै छै रोग भगाबै लें॥३०॥

तीन महीना होते—होते,
 रोगी होलों छै चंगा।
 कहों प्रेम से हर—हर गंगा,
 कहों प्रेम से हर गंगा॥३१॥

ढाई साल रोग नें लौटै,
 राधे बाबा से बोलै।
 मंदिर खातिर जग्घों दै के,
 बाते बाबा लग खोलै॥३२॥

बाबा बोले लिखा—पढ़ी तें,
 पहिने ही होतौ मानें।
 आगे वै पर तोरों कब्जा,
 कहियो नें होतौ जानें॥३३॥

लिखा—पढ़ी होला के बादे,
 काम शुरू जखनी होलै।
 राधे साहों के परिवारें,
 बात जरा टेढ़ें बोलै॥३४॥

बन्द कराबै कामों आबी,
 कहै बनाना बन्द करें।
 पहिने बँटवारा करना छै,
 हिस्सा अखनी जल्द करें॥३५॥

बाबा सोचै मानवता के,
हास अभी छै लोगों में।
धर्म-कर्म सब भूली गेलै,
लागी गेलै भोगों में॥३६॥

अनशन पर बैठे छै बाबा,
पाँच दिना रहलै भुखलों।
देह-दशा गललों गेलै नित,
अन्न बिना लागै सुखलों॥३७॥

पर नैं राधे साहों करों,
डोलै छै कुछ घरवाला।
घुमै-फिरै आगू में आबी,
लागै जेना मतबाला॥३८॥

बाबा सोचै 'अब दुनिया में,
बेकारे हमारों जीना।
ईश्वर भी नाराज लागै छै,
अच्छा छै मुँह कें सीना॥३९॥'

लकड़ी फाड़ी करै इकट्ठा,
चिता सजाबै हाथों सें।
हरिश्चन्द्र वाला किस्सा भी,
नैं निकलै छै माथों सें॥४०॥

खरीदार नैं हरिश्चन्द्र कें,
काशी में मिललै जखनी।
जीवन जीना व्यर्थ लागै छै,
चिता सजाबै छै तखनी॥४१॥

उलटा सूरज ऊपर चढ़लै,
हरिश्चन्द्र कें बचबै लें।
सूत्रधार तें ईश्वर छेकै,
जीव-जीव कें नचबै लें॥४२॥

बाबा करों चिता सजलका,
सब लोगों कें झलकै छै।
उमड़ें लगलै भीड़ वहाँ पर,
सबके छाती दलकै छै॥४३॥

साहों के परिवारों सबकें,
पकड़ी-पकड़ी लानै छै।
चिता सजलका पर फेकै के,
बाते सब्भे ठानै छै॥४४॥

राधे साह गला में गमछी,
डाली कें कर जोड़ै छै।
उमतैलों लोगो जे छेलै,
सबनें सबकें छोड़ै छै॥४५॥

बाबा के आशीर्वादों से,
 : खतम हुवै सभ्मे झगड़ा।
 ई तें राधे परिवारों के,
 झलकै छै सबके रगड़ा।।४६॥

मंदिर के निर्माण करै में,
 सभ्में जोर लगाबै छै।
 बाबा के सुन्दर कामों से,
 जनता सब हरसाबै छै।।४७॥

उन्नीस सौ बीस ईस्वी में,
 मंदिर जब पूरा होलै।
 मूर्ती भव्य मनोहर चाही,
 जनता आबी के बोलै।।४८॥

राम—जानकी—लक्ष्मण साथे,
 हनुमानों बैठाबै छै।
 प्राण—प्रतिष्ठा धूम—धाम से,
 विधि पूर्वक करबाबै छै।।४९॥

एकवार ऋषिकुण्डों में जब,
 भंडारा करबावै छै।
 भंडारा में लोग हजारों भोजन,
 पाबे आबै छै।।५०॥

जमुना दास रहै बाबा लग,
 देखी के घबड़लै तब।
 कैसें पुरतै सबके भोजन,
 कहनें—कहनें ऐलै तब।।५१॥

बाबा डाँटै छै जोरों से,
 सभ्मे होतै जानी लें।
 माय जोगिनी सवालाख सब,
 पूरा करतै मानी लें।।५२॥

खैतें—खैतें लोग अघैलै,
 नैं भंडारा खाली छै।
 बाग उजड़तै कैसें कोनों,
 रखवाला जब माली छै।।५३॥

ऐलों—गेलों साधु—संत सब,
 देखी बाबा के माया।
 सभ्में सोचै बाबा ऊपर,
 छै ईश्वर केरों साया।।५४॥

बाबा के देखी के लीला,
 गौवाँ हर्ष मनाबै छै।
 बाबा के अपना गामों में,
 आबी के बोलाबै छै।।५५॥

बाबा पहुँचै गाँव जखनियें,
जोरों से झांझ बजाबै।
घर के सभ्मे कामे छोड़ी,
दौड़ी झट सभ्मे आबै ॥५६॥

बाबा के आशीर्वादों से,
पड़लों जे काम अधूरा।
बाबा के अकबाली मानों,
सभ्मे के होलै पूरा ॥५७॥

बाबा केरों जन्म-भूमि पर,
गेलै कुछ ध्यान जखनियें।
पूजा कर प्रसाद पाबी के,
चललै घोर तखनियें ॥५८॥

नर-नारी, बच्चा-बूढ़ों सब,
दौड़ी-दौड़ी आबी के।
चरण-धूल मस्तक पर रगड़ै,
बाबा के गुण गाबी के ॥५९॥

गंगा तट पर बाबा गेलै,
मनसा यज्ञ कराबै के।
रामधुनी सत्संग वहाँ पर,
हरिगुण कुछ दिन गाबै के ॥६०॥

झौवा बयिहार निकट छेलै,
जे बयिहार तीन सहिया।
बढ़िया काम भला ऊ वन में,
कैसें के करतै कहिया ॥६१॥

गंगा यज्ञ अनुष्ठान वहाँ,
ठानी जब लै छै बाबा।
सबलोगों के झलके लगलै,
वोही ठाँ काशी-कावा ॥६२॥

यज्ञ कार्य तें पूरा होलै,
मुरती ढेरी बैठाबै।
झौवा बयिहारों में तखनी,
मंदिर सुन्दर बनबावै ॥६३॥

तखनियें जे कल्याण टोला में,
मंदिर बनबैनें छेलै।
संतावने साल बाढ़ में,
गंगा पेटों में गेलै ॥६४॥

ऋषि कुण्डों में जाप करै में,
बाबा समय बिताबै छै।
तखनी बुढ़वा दीरा केरों,
लोग वहाँ पर आबै छै ॥६५॥

ऊ दीरा में यज्ञ करै के,
 : सबमें हठ कें ठानै छै।
 बाबा रहै उदार तुरन्ते,
 बातो सबके मानै छै ॥६६॥

बाबा पहुँचै बुढ़वा दीरा,
 सबमें छेलै खुशहाली।
 लागै बाबा साथें ऐलै,
 माँ दुर्गा, लक्ष्मी, काली ॥६७॥

राम लौटलौं लगै अयोध्या,
 जैसें की बनवासों सें।
 फूलों के वर्षा भी लागै,
 हुवै रहै आकाशों सें ॥६८॥

घर—परिवारो, गाँव—मुहल्ला,
 देखी कें गदगद छेलै।
 सब्भै करौं मुख—मंडल पर,
 हँसी—खुशी नाचै—खेलै ॥६९॥

यज्ञ कार्य सम्पन्न कराबै,
 खूबे धूमों—धामों सें।
 जय—जयकार करै बाबा के,
 सब खुश बाबा कामों सें ॥७०॥

सर्ग—सात

जकरो अंतिम काल में,
 नाड़ी पहुँचै काँख।
 संभव छै कल्याण जब,
 मैया खोलै आँख ॥१॥

गंगा मैया सगर सुत,
 तारै साठ हजार।
 शापों सें होलौं रहै,
 जे धरती पर क्षार ॥२॥

भक्तों करौं माय नित,
 करने छै कल्याण।
 धार्मिक सब्भे ग्रंथ में,
 अकित ढेर प्रमाण ॥३॥

ऋषिकुण्डो बरियारपुर,
 सें पूरव के ओर।
 सुलतानगंज पहुँचलै,
 बाबा भोरे—भोर।।४।।

अजगैबी कें पूजनें,
 बड़ा धैर्य के साथ।
 बाबा अनन्त दासजी,
 पहुँचै बूढ़ानाथ।।५।।

कुच्छू क्षण वैठाँ रूकै,
 बाबा अनन्त दास।
 परबत्ता तक पहुँचना,
 मतलब छेलै खास।।६।।

परबत्ता में यज्ञ के,
 आयोजन अनमोल।
 बाबा जब नैं पहुँचतै,
 कैसें बजतै ढोल।।७।।

बूढ़ानार्थों के निकट,
 छै आदमपुर घाट।
 माँझी—मल्लाहा वहाँ,
 दिखलाबै छै डाट।।८।।

बाबा बोलै आज तों,
 कर हमरा ऊ पार।
 पर नैं माँझी एक भी,
 होलै जब तैयार।।९।।

बाबा नैं घबड़ाय छै,
 नैं दिखलाबै क्रोध।
 मल्लाहा सबके कहै,
 तों सब निरा अवोध।।१०।।

भगवानें तोरों करौ,
 जो बेटा कल्याण।
 तों नैं सिखलें केकरो,
 करना कुछ सम्मान।।११।।

बाबा गंगा में चलै,
 गोड़ें पहन खड़ाम।
 दर्शक टुकटुक देखतें,
 रहलै इनको काम।।१२।।

पैदल बाबा करलकै,
 गंगाजी कें पार।
 घाटों पर ऊ वक्त तें,
 छेलै भीड़ अपार।।१३।।

झोरी माँझी हाल तक,
कथा सुनावै भाय।
बाबा कैरों भक्ति में,
दर्शक मोन रमाय।१४॥

बाबा परबत्ता पहुँच,
देलकै झाँझ बजाय।
सेवक सेवा में लगै,
बाबा के गुण गाय।१५॥

यज्ञ कार्य पूरा करै,
मेटै सबके पीर।
यज्ञ कराबै में रहै,
बालदेव, रघुवीरं।१६॥

आखारों के पूर्णिमा,
यज्ञ कार्य सम्पन्न।
कोनों भी वाधा वहाँ,
नै होलै उत्पन्न।१७॥

पंडित भोजन दक्षिणा,
पाबी कें हर्षाय।
कीर्त्तनियाँ सब भाव सें,
बाबा के गुण गाय।१८॥

बाबा अहिनों आदमी,
पर जादू के खेल।
करनें बिन छोड़ै कहाँ,
नै दै ककरो सेल।१९॥

बाबा कें चौअनियाँ,
शंकरपुर के लोग।
मंत्रित वाणों सें करै,
विहवल ई संयोग।२०॥

देखी कें बेचैन जब,
सब गेलै उमताय।
बोलै के छेकै कहाँ,
झट लेबै फड़ियाय।२१॥

नै रहतै ऊ भूमि पर,
नै करतै उत्पात।
तोरों ई तकलीफ सें,
आग लगै छै गात।२२॥

बाबा बोलै सब यहाँ,
करनी के फल पाय।
जैतै निश्चित लोक ऊ,
जानी लें सब भाय।२३॥

बाबा बोलै गोड़ में,
काँटी छौ अनुमान।
ताकतबाला आदमी,
आबी पकड़ी टान ॥२४॥

करना चाही आपन्हें,
पर हममें लाचार।
बिल्कुल असहय दर्द के,
सहना मुश्किल भार ॥२५॥

ऐलै ठाम्हें आदमी,
जकरो हृदय कठोर।
दाँतो से काँटी पकड़,
खूब लगाबै जोर ॥२६॥

काँटी बाहर निकललै,
बाबा करों संग,
जत्ते छेलै आदमी,
सब्भे होलै दंग ॥२७॥

औरत जे करने रहै,
बाब देहें वार।
कुष्ट रोग से ग्रसित ऊ,
देखलकै संसार ॥२८॥

रूद्र यज्ञ ऊ जगह पर,
लै छै बाबा ठान।
मिललै वै में सफलता,
जकरो नै अनुमान ॥२९॥

ग्यारह दिन तक धूम से,
यज्ञ-हवन के काम।
रामधुन, सत्संग-भजन,
नितदिन आठो याम ॥३०॥

बीचों में घटना घटै,
सुनबै छी फिलहाल।
करें सकें खाढ़ों यहाँ,
श्रोता बहुत सवाल ॥३१॥

बाबा के आगू गिरै,
सेवक एक धड़ाम।
बोलै यज्ञ-हवन में,
धीरों के छै काम ॥३२॥

पर टीनों में बूंद भर,
धी नै देखौं आय।
धीरों के जल्दी करौं,
बाबा कोय उपाय ॥३३॥

बाबा बोलै घी तुरत,
आबी जैतै हाथ।
पर यै में कुछ शर्त छौ,
सुनें धैर्य के साथ॥३४॥

लौटाबेँ होतौ सुनें,
काम—काज के बाद।
भुलैइहें नैं भूल सें,
शर्त राखिहें याद॥३५॥

गिरलै गोड़ों पर तुरत,
झुकलै सबके माथ।
उठलै आशीर्वाद लें,
बाबा केरो हाथ॥३६॥

गंगा मैया सें कहें,
पैचा घी दें आज।
लौटैबै जल्दी जहाँ,
पूरन होतै काज॥३७॥

शंकरपुर जौअनियाँ,
के एगो इंसान।
दुक्खा मंडल साथ में,
चलै लगैनें ध्यान॥३८॥

बर्तन डालै गांग में,
अर्ज करै बन दीन।
गंगा मैया के कृपा,
घी सें भरलै टीन॥३९॥

गर्म कड़ाही में जबेँ,
टीना उझलै लान।
देखी घी के रंग केँ,
सब्भेँ लै पहचान॥४०॥

चमत्कार के बात ई,
बाबा के अकबाल।
कठिन समस्या सामनें,
बाबा दै झट टाल॥४१॥

बाद बरारी घाट में,
मूर्ति रूद्रावतार।
बाबा बनबाबै करै,
भक्तो के उपकार॥४२॥

घाट रजण्डीपुर जहाँ,
यज्ञ करै के बात।
बाबा ठानी लेलकै,
अवसर तब शिवरात॥४३॥

धुन के पक्का आदमी, मैं गांग लीड फीर
 हैं कहियो घबड़ाय।
 गोड़ बढ़ाबै जब जहाँ, गांग के गांग
 ॥ १६॥ वहीं सफलता आय ॥ १४४ ॥

एक वार मलमास में, काल में डिङ्क मंग
 बाबा छेले दूरी
 ऋषिकुण्डों में भक्तगण, के गांग के डि डिङ्क
 ॥ ०४॥ बड़ी रहै मजबूर ॥ १४५ ॥

झण्डी गाड़ै के समय, डे गांग के प्रकाम
 बाबा के दरकार।
 खबर पीरपैती करौं, मंगल मंगल फीर
 ॥ १४॥ ककरा पर दौं भार ॥ १४६ ॥

खाढ़ों आश्रम लग रहै, मैं गांग गिराङ्क गांग
 चिन्तित भक्त दास।
 चलें पीरपैती तुरत, एक गांगल गांग
 ॥ १४॥ बाबा केसे पास ॥ १४७ ॥

पहुँची गेलै शाम तक, गांग मृडिणल गांग
 बाबा के मजदीक।
 बैठे बाबा ध्यान में, कैलल निठ गांग
 ॥ १४॥ जगह बड़ी समीक ॥ १४८ ॥

आग्रह भगवत दास के, गांग डरु के गांग
 बाबा लै सिर धार।
 शीघ्र पहुँचना छै वहाँ, डि डि डि डि डि
 बाबा करै विचार ॥ १४९ ॥

खाना भगवत दास के, गांग लुई के गांग
 बाबा तब खिलवाय।
 बोलै गाड़ी झट पकड़, गांगल गांगल गांग
 दिखलाबें चतुराय ॥ १५० ॥

देर जरा नें पहुँचबौ, गांगल गांगल गांग
 पीछू से ही आय।
 भेजै भगवत दास के, गांगल गांगल गांग
 भली-भाँति समझाय ॥ १५१ ॥

उतरै भगवत रतनपुर, मलीर के गांग मृडिणल
 पहुँचै जब ऋषिकुण्ड।
 देखै खाढ़ों लोग सब, डि डि डि डि डि
 वहाँ झुण्ड के झुण्ड ॥ १५२ ॥

बाबा बीचों में रहै, गांगल गांगल गांग
 भरलों रहै उमंग।
 कैसे बाबा पहुँचलै, डि डि डि डि डि
 सोची छेलै दंग ॥ १५३ ॥

बाबा बोलै कुछ कहाँ,
घबड़ाबै के बात।
हम्में सोचौं ट्रेन सें,
होतै बड्डी रात।।५४।।

तेजी सें पैदल चलौं,
ऐलों तोरों साथ।
चिन्ता छोड़ी प्रेम सें,
बोलौं भोले नाथ।।५५।।

अन्यायी अंग्रेज के,
जुल्म करै जब जोर।
देश प्रेम करौं लहर,
मारै हृदय हिलोर।।५६।।

बिहपुर थाना के पुलिस,
खूब करै उत्पात
राजेन्द्र बाबू वहाँ,
पहुँचै रातोरत।।५७।।

तखनी अनंतदास जी,
मिललौं छेलै जाय।
राजेन्द्र बाबू कहै,
बाबा कें मुस्काय।।५८।।

आशीर्वादी चाहियों,
देश हुवें आजाद।
अंग्रेजें हरदम करै,
देशों कें बरबाद।।५९।।

बाबा बोलै स्वप्न में,
कहनें छै श्रीराम।
हिम्मत मत हारों कभी,
होतै काम तमाम।।६०।।

बहुत जल्द आजाद अब,
होतै हिन्दुस्तान।
स्वतंत्रता लेनें यहाँ,
बिराजतै दिनमान।।६१।।

झंडा फहरै सूर्य में,
देश हुवै आजाद।
मिटलै भारत देश के,
लोगों के अवसाद।।६२।।



सर्ग-आठ

गीत

ऋषिकुण्डो के महिमा अपार भइया
 लोग पहुँचें जहाँ बेशुमार भइया।
 उच्चो पहाड़ जहाँ बाघ गुराबै।
 पानी पियासलों सिंह वहाँ आबै।
 जीव-जन्तु करै वहाँ विहार भइया॥ ऋषि...।

गाछ-बिरीछी देखी मन हर्साबै।
 चिड़ियाँ नाची-नाची गीत सुनाबै।
 करै पर्यावरण के सम्हार भइया॥ ऋषि...।

जुग सें गरम-गरम पानी के झरना।
 मनमा मोही लै छै कलकल करना।
 सब दुखखों के करै छै, क्षार भइया॥ ऋषि...।

झुमलों ऊपर सें उतरै छै बादल।
 झलकै कारों जेना आँखी के काजल।
 करै स्वागत गछिया के डार भइया॥ ऋषि...।

भुरका वही ठाँ बहै एगो सोता
 जे कोय लगाबै सोता में गोता
 चर्म रोगें मानी लै हार भइया ऋषि...।

जमाना सें ऋषि-मुनि ध्यानमा लगाबै।
 तपस्या के बलपर परम पद पाबै।
 होलै यहाँ योगी उद्धार भइया॥ ऋषि...।

चंचल बाबा साथें अनंत बाबा।
 ऋषि कुण्ड रहै उनको कासी-काबा।
 वहाँ छेलै स्वरगों के द्वार भइया॥ ऋषि...।

शृंगी ऋषि ऋषिकुण्डों के छेलै।
 जकरा सें बेटा दशरथ घर खेलै।
 जे करलक शांता सें विवाह भइया॥ ऋषि...।

ऋषि कुण्डें बसै छै योगिनी मइया।
 सबके मनोरथ करै पूरा मइया।
 मेटै कोखी के सब्भे विकार भइया॥ ऋषि...।

अंधा, लंगड़ा पहुँचै सब्भे वहवाँ।
 मलेमास मासें गाछी के छहवाँ।
 दिनरात करै प्रभु सें गुहार भइया।
 ऋषि कुण्डों के महिमा अपार भइया॥ ऋषि...।

छन्द-चौपाई

ऋषिकुण्डों के अद्भुत लीला। कथा मनोहर परम रसीला।
जीव भयानक बाघो ज्ञानी। करै जरा भी नैं मनमानी।
पीठी पर लें घूमै बाबा। नैं कखनूँ ककरो पर धाबा।
चिड़ियाँ चुनमुन-चुनमुन करनें। आबी बैठै बाबा शरणें।

जीव जंगली आज्ञाकारी। बाबा के ई महिल न्यारी।
बाबा सें दीक्षा पावै में, बाबा केरों गुण गाबै में।
ध्यान लगैनें रहलै लोगें। सबके तारै ध्यानें-योगें।
बदरी दासों केँ दै दीक्षा। योगों आरू तप के शिक्षा।

तब बलदेव बनाबै चेला। दोनों तें छेलै अलबेला।
जब तक रहलै वाँही रहलै। दुख-सुख सब्भे बाँटी सहलै।
अन्त समय जब गेलै आबी। ईश्वर के गुण गाबी-गाबी॥
बाबा केरों नाम पुकारी। सब्भे गेलै स्वर्ग सिधारी।

भरत दास तब दीक्षित होलै। मधुर वचन बाबा सें बोलै।
हम्में महदेवा में रहबै। दुख-तकलीफों सब्भे सहबै।
मगर बनैबै ठाकुरबाड़ी। रोक लगैबै दारू-ताड़ी।
स्वर्ग धरा पर होतै जग्घों। बनबै हमेशा एक बग्घों।

सचमुच वोहिनें काम करलकै। बाबा सिर पर हाथ धरलकै।
तिनटंगा, कुरसेला केरों। परबत्ता के जेरों-जेरों।
बाबा केरों आगू आबै। बाबा आगू शीश झुकाबै।
बिन्दा दीरा के हरि दासो। वृन्दावन नैं करलक वासो।

बचपन सें ही फेरै माला। सबदिन ही रहलै मतवाला।
बौकू नरगा मोहनपुर के। सधलें छेलै गल्ला सुरके।
रहै नारदी भजन प्रवीणा। भजन ओकरो मरना-जीना।
दूधैला केरों नेपाली। सत्संगों में रमलै खाली।

कसमावादों केरों सक्कल। ठोस रहै उनको भी अक्कल।
राम-जानकी ठाकुरवाड़ी। सब्भे रहलै अड्डा गाड़ी।
हकरू, मिश्री, मौजी, डोमन। बाबा सेवा में दै तन-मन।
जागेश्वर पर सबसें प्यारा। बाबा केरों बड़ा दुलारा।

रहै बड़ी भारी कीर्तनियाँ। बजबै ढोल, नाल, हरमुनियाँ।
ऋषि कुण्डों में कीर्तन गाबै। एकरात जब वहीं बिताबै।
देखै बाबा लग बाघों केँ। कोसै तब अपना भागों केँ।
काँपै डर सें थर-थर-थर-थर। आँखी में आँसू भी भर-भर।

बाघ गोड़ बाबा के चूमै। बाबा के साथें ही घूमै।
जागेश्वर केँ तब समझाबै। माथा केरों भूत भगाबै।
निर्भय हों यहाँ पर चेला। यहाँ कहाँ छै जरा झमेला।
जीव-जीव सब एक यहाँ पर। मोन रमाबों जहाँ-जहाँ पर।

जागेश्वर के मन बहलाबै। होशों में जागेश्वर आबै।
एकवार विशनपुर दियारा। बाबा पहुँची डालै डेरा।
यज्ञ कराना सेवक चाहै। बाबा देखी मन में आहे।
खर्चा-बर्चा होतै भारी। नैं अखनी कुच्छू तैयारी।

लोग इलाका के सब जगलै। जी-जानों से ये में लगलै।
बनै यज्ञशाला अति सुन्दर। पण्डित जूटै बड़ा धुरंधर।
आहुति पढ़ै वहाँ खीरों के। जलै वन गोइठा दीरों के।
यज्ञ स्थल पर बड़ा इनारा। पानी लेली वहाँ सहारा।

दू ठो मटकुइयाँ बनबाबै। मेला दुनिया भर लगबाबै।
बढ़लै कुछ मगर परेशानी। सुखलै कुइया करों पानी।
मचबै हाहाकार वहाँ जब। चिन्तित लागे लोग वहाँ सब।
सब बाबा से अरज सुनावै। तब बाबा कुछ भेद बताबै।

मनाबे कमला महारानी। बोहीं देतौ तेरा पानी।
आमंत्रण में गलती करलें। अपना सिर पर बोझा धरलें।
लाने फूल-सुपाड़ी, चावल। लें ले थोड़ा सा दुर्बादल।
तुलसी दल नैं भूली जइहें। मारकीन कपड़ा भी लइहें।

जखनी सरमजाम सब जुटलै। बाबा धीरें-धीरें उठलै।
बाबा बोलै कमला मैया। जल्दी पार लगाबों नैया।
माफ करों गलती बच्चा के। दिखलाबों युग छै सच्चा के।
धूप-दीप-नैवेद्य चढ़ावै। कुइयाँ पर कपड़ा ओढ़ावै।

आधा घंटा करों अन्दर। उमड़ी पड़लै वहाँ समंदर।
यज्ञ सफल होलै मनभावन। जग्घों ऊ बनलै अति पावन।
यज्ञ के सामान जे बचलै। रामधुन ओकरा से मचलै।
बैकुण्ठपुर-दुधैला बगले। वहाँ सत्संग छेलै लगले।

मेंहीं बाबा लगलौ छेलै। लेकिन लोग वहाँ नैं गेलै।
मेंहीं बाबा चिन्तित होलै। चिन्ता से सारा तन डोलै।
अनन्त बाबा के लग गेलै। ध्यान मग्न बाबा तब छेलै।
बाबा बाबा मनसे मिललै। हृदय-कली दोनों के खिललै।

मेंहीं दास विषय पर आबै। सत्संगों के हाल सुनावै।
अनन्त बाबा बात बताबै। मेंहीं बाबा के समझावै।
करने छों काम मेंहींनिया। जकरा से भागै छै दुनिया।
मोटों काम अगर अपनैभें। तबे सफलता निश्चित पैभें।

रामधुनी के शोर मचाबों। झाल-झांझरी, ढोल बजाबों।
मेंहीं बाबा के बतलाबै। मेंहीं बाबा अर्ज सुनावै।
सत्संगों लें समय निकालों। सबके अपना रंगे ढालों।
वातावरण बदलतै पूरा। नैं तें रहतै काम अधूरा।

अनंत बाबा पाँव धरलकै। रामधुनी आरंभ करलकै।
अनन्त बाबा के मनसूबा। उमड़ी पड़लै भीड़ अजूबा।
राम-जानकी मंदिर सेवा। से बाबा के मिललै मेवा।
एक सौ आठ दिन तक रहलै। सत्संगों के धारा बहलै।

रोजे भोग, लगाबै चन्दन। देवी-देवों के अभिनंदन।
जगलै पूरा लोग वहाँ के। धरती बंजर रहै जहाँ के।

सर्ग-१

नाथनगर के क्षेत्र में,
जगह एक रमनीक।
बसलों साहबगंज छै,
गंगा के नजदीक।१॥

ठाकुरबाड़ी भव्य छै,
वही जगह पर आज।
गंगोत्री समुदाय के,
जकर ऊपर राज।।२॥

कथा-कहानी ऊ जगह,
बनलों छै बेजोड़।
जहाँ दियारा क्षेत्र में,
बाबा धरलक गोड़।।३॥

दूधैला करों निकट,
छेलै शाहाबाद।
अगल-बगल बैकुण्ठपुर,
वहाँ-वहाँ अवसाद।।४॥

बाबा घूमै गाँव-घर,
जमा करै कुछ लोग।
गामों के गणमान्यगण,
सैं माँगै सहयोग।।५॥

दीरावासी सैं कहै,
करों यहाँ कुछ काम।
स्वर्ग बनाबों क्षेत्र कें,
अमर यहाँ के नाम।।६॥

रहतै जैठाँ साधुजन,
होतै ऊ निर्माण।
साधु-संत के साथ ही,
दीरा के कल्याण।।७॥

अनंत बाबा के कहों,
व्यक्तित्व के प्रभाव।
जगलै जन गणमान्य सब,
सब में जगलै चाव।।८॥
होय इकट्ठा लोग सब,
करलक सोच-विचार।
फेनूँ चन्दा में लगै,
घूमै द्वारे-द्वार।।९॥

मजदूरी पर बोझ दै,
नितदिन आना चार।
तीन रुपैयां हॉर पर,
नैं ज्यादा कुछ भार।१०॥

लोगों के सहयोग सें,
चन्दा होलै ढेर।
बढ़िया कामों में भला,
केना लगतै देर।११॥

नेपाली मंडल रहै,
गाओं के सिरताज।
उनका पर गणमान्य कें,
छेलै पूरा नाज।१२॥

राम—जानकी नाम सें,
लें जमीन समझाय।
चन्दा उनका पास में,
जमा करलकै जाय।१३॥

नेपाली मंडल रहै,
भक्ति भाव में लीन।
हुनी रायपोखर जहाँ,
कीनै जाय जमीन।१४॥

अट्ठारह बीघा कहों,
लम्बा—चौड़ा ठीक।
गाँव—मुहल्ला पास में,
कुल्हड़िया नजदीक।१५॥

राम—जानकी नाम सें,
मगर निबंधन कार्य।
नैं होलै जे लोग लें,
छेलै कुछ अनिवार्य।१६॥

राम—जानकी नाम सें,
अड़चन—वाधा देख।
काम रोकना ठीक नैं,
बदली गेलै लेख।१७॥

नेपाली के नाम सें,
सुनी निबंधन भाय।
बढ़िया—बढ़िया लोग भी
तब गेलै घबड़ाय।१८॥

लोग पहुँचलै द्वार पर,
आपत्ती के संग।
देखी तीनों भाय कें,
मन में बड़ा उमंग।१९॥

नेपाली, घुघली रहै,
रहै अमासी साथ।
तीनों कौनों काम में,
सदा बँटावै हाथ॥२०॥

नेपाली बड़का कहों,
घुघली छोटों भाय।
रहै अमासी बीचला,
तीन्हूँ साथें खाय॥२१॥

फनूँ निबंधन बात पर,
होलै सोच-विचार।
नेपाली मंडल रहै,
लिक्खै लें तैयार॥२२॥

लिखा-पढ़ी के दौर में,
लगै वर्ष दू-चार।
बाइस बीघा दौं लिखी,
लेलक माथा भार॥२३॥

कागज-पत्तर ठीक कर,
जब निश्चित सब कोय।
राम-जानकी नाम से,
लिखा-पढ़ी तब होय॥२४॥

अनंत बाबा की कृपा,
स्वीकारै समुदाय।
केना थकतै लोग सब,
बाबा के गुण गाय॥२५॥

देखों साहबगंज के,
ठाकरबाड़ी आज।
कैसे बनलों छै सुनों,
यै में बड़का राज॥२६॥

मूर्ति वीर हनुमान के,
जहाँ कंपनी बाग।
लें जाना छेलै वहाँ,
पर जग्घों के भाग॥२७॥

गिरलै साहबगंज में,
गाड़ी से हनुमान।
सुखलों बरगद पेड़ लग,
जे छेलै सुनसान॥२८॥

नैं उठलै हनुमान जी,
करलक कोटि उपाय।
अपनों-अपनों भाग्य पर,
छेलै सब पछताय॥२९॥

बाबा भी ठहरे वहाँ,
जहाँ वीर हनुमान।
बाबा कें कोनों जगह,
करना छेलै ध्यान॥३०॥

वही राह सें कचहरी,
चललै महेश घोष।
केश—मुकदमा के रहै,
मन में भी अफसोस॥३१॥

करै नमन शंकर सुवन,
तब बाबा लग जाय।
हाथ जोड़ विनती करै,
बोलै कष्ट बुझाय॥३२॥

माथा ऊपर हाथ रख,
बाबा दै आसीस।
निश्चित छौ तोरों विजय
कृपा करौ जगदीश॥३३॥

विजयी होलै घोष सच,
ऐलै बाबा पास।
लड्डू लेनें हाथ में,
तन—मन में उल्लास॥३४॥

बाबा लड्डू कें जरा,
नें ताकै इक्वार।
भाव बुझलकै घोष जी,
होलै झट तैयार॥३५॥

बोलै हमरों ई जगह,
जमीन जे अनमोल।
मंदिर लेली दान में,
दौं हम्मैं दिल खोल॥३६॥

बाबा कल हमरा घरें,
राखों अपनों पैर।
धन्य—धन्य होतै धरा,
नें समझों कुछ गैर॥३७॥

कल्हे बन्दोवस्त भी,
करबै जमीन जाय।
बाबा तों साथें रही,
लें जमीन लिखवाय॥३८॥

होना जे छेलै वहें,
होलै सच्चा भाय।
शुभ मुहुर्त, शुभ—शुभघड़ी,
बन्दोवस्त कराय॥३९॥

मंदिर के निर्माण में,
 लगलै जे सब लोग।
 हरि मंडल, नरसिंह के,
 पूरा ही सहयोग।।४०।।

लालजीत, जगदम्ब भी,
 लगलै रहलै साथ।
 ताले मंडल भी वहाँ,
 खूब बँटाबै हाथ।।४१।।

राम—जानकी साथ में,
 लक्ष्मण करों स्थान।
 औढरदानी पार्वती,
 वहीं वीर हनुमान।।४२।।

बाबा के अद्भुत कृपा,
 मंदिर स्वर्ग समान।
 साधु—संत बैठी वहाँ,
 खूब लगाबै ध्यान।।४३।।

पाँचो देखनहार जे,
 पैसा वाला लोग।
 बढ़िया—बढ़िया काम में,
 करै रहै सहयोग।।४४।।

हरि मंडल एन.जी.ए.,
 विद्यालय दै खोल।
 शिक्षा करों क्षेत्र में,
 काम बड़ा अनमोल।।४५।।

ई सब बढ़िया काम सें,
 मन में भरै उमंग।
 पन्नूचक के लालजित,
 देखी रहलै दंग।।४६।।

यज्ञ भवन बनवाय के,
 लेलक मोन बनाय।
 रामों के दरवार भी,
 देलक तुरत सजाय।।४७।।

अन्दर एक्के साल के,
 शिव—गौरी हनुमान।
 जकरा चाहों सब वहीं,
 करों हमेशा ध्यान।।४८।।

बाबा अनंत दास की,
 जय बोलो सब कोय।
 नाव पार मझधार सें,
 दया दृष्टि जब होय।।४९।।



सर्ग-दस

जे राम—जानकी गंगोत्री
 ठाकुरबाड़ी छै सुन्दर।
 वहाँ यज्ञ के धूम समैलै,
 सब्भै के मन के अंदर।१॥

यज्ञ वहाँ पर करलौं गेलै,
 मूर्ति वहाँ बावन बनलै।
 यज्ञों बीचें वहाँ जरूरत,
 तखनी घीयों के पड़लै।२॥

गंगा सें पैचो दिलबाबै,
 बाबा अनंत दासें नें।
 बदलै वातावरणें वैजाँ,
 घी के सुन्दर वासें नें।३॥

गंगा सें घी माँगे वाला,
 खेसाड़ी यादव तखनी।
 साथ रहै जागेश्वर जी भी,
 दोनों नें रहलै अखनी।४॥

तिरानवे तक कथा कहानी,
 खूब सुनै नें छै हुनियें।
 अखनी अनंत बाबा पासें,
 गेलै छोड़ी कें दुनियें।५॥

राघोपुर में यज्ञ कराबै,
 बाबा धूमों—धामो सें
 परिचित रहै इलाका वासी,
 बाबा करौं नामों सें।६॥

घी यज्ञों में घटना—बढ़ना,
 बाबा करौं लीला छै।
 उनखै सें सब पूरा होना,
 बातो बड़ी रसीला छै।७॥

महदेवा ठाकुरवाड़ी में,
 देवी कें बैठाबै लें।
 गंगा लेगी गेलै तखनी,
 आशीर्वादो पाबै लें।८॥

मरगंगा पारें गंगा छै,
 मुश्किल पार उतरना छै।
 बाबा छै जब सार्थों में तब,
 भक्तों कें की डरना छै।९॥

बाबा सौ सें अधिक आदमी,
 लें अपना सार्थों में।
 पैदल गंगा में जब घुसलै,
 जीवन गंगा हार्थों में।१०॥

बूढ़ा एगो छूटलै पाछू,
जहाज देखै आबै छै।
बूढ़ा कें जल्दी अपना लग,
बाबा तुरत बुलाबै छै।११॥

ई लीला आँखी से देखै,
बूढ़ा, जवान, बच्चा नें
आँचों कें टारी देनै छै,
सब दिन एन्हें सच्चा नें।१२॥

पूजा-पाठ करलकै, तखनी,
बाबा गंगा पारों में।
बाबा कें दर्शन दै खातिर,
ऐलै गंगा धारों में।१३॥

ई लीला बाबा तक रहलै,
बाबा के महिमा न्यारी।
गंगा सिर पर धारै हरदम,
श्री गंगाधर त्रिपुरारी।१४॥

नाविक बौला पार करै लें,
बाबा कें तब नावों से।
रहै प्रभावित बाबा पूरा,
नाविकों के प्रभावों से।१५॥

ऐलै लौटी महदेवा तब,
प्राण-प्रतिष्ठा करबावै।
अनन्त बाबा की जय बोलो,
झूमी-झूमी सब गाबै।१६॥

सुलतानगंज के घाटों के,
चमत्कार भी जानी लें।
मल्लाहा सब बड्डी दुर्जन,
छेलै तखनी मानी लें।१७॥

बाबा कें नें पार उतारै,
बोलै टेढ़ों जानी कें।
बाबा दै छै दण्ड वहाँ पर,
ऊ नाविक अभिमानी कें।१८॥

बाबा पैदल पार उतरलै,
नाव पार नें लागै छै।
रातों भर गंगा के बीचें,
तभिये नाविक जागै छै।१९॥

घाटों पर के लोग अचम्भित,
नाव किनारा आबै नें।
मल्लाहा जी-जान लगाबै,
मगर पार तब पाबै नें।२०॥

बाबा गंगा कें पूजी कें,
 आगू कदम बढ़ावै छै।
 घाटों पर-के मल्लाहा तब,
 दौड़ी आगू आवै छै ॥२१॥

बाबा के चरणों पर गिरलै,
 आँसू आँखी में भरलौं।
 बाबा नैया पार लगाबौं,
 सब तोरे छेखौं करलौं ॥२२॥

बाबा करौ कृपा-दृष्टि सें,
 नाव किनारा लागै छै।
 नावों पर करौ जनता के,
 तकलीफे सब भागै छै ॥२३॥

नावों सें उतरी मल्लाहा,
 गिरलै गोड़ों पर आबी।
 लोग हजारो धन्य वहाँ पर,
 बाबा के दर्शन पाबी ॥२४॥

जयमंगल टोला राघोपुर,
 के बीचें वैष्णव काली।
 जूटै गामों के महिला सब,
 लेनें पूजा के थाली ॥२५॥

पर मैया कें सब्नें मानै,
 भैसा-बकरा के आदी।
 यै पीछू धन-संपत करौं,
 पूरा छेलै बरबादी ॥२६॥

महारूद्र यज्ञो धूमों सें,
 बाबा वैठाँ करबाबै।
 बाबा सब्भै के नजरों में,
 अब्बल दर्जा में आबै ॥२७॥

जब बाबा राघोपुर गेलै,
 गेलै काली प्रांगण में।
 तब देखै छै महिका गइलौं,
 लम्बा-चौड़ा आंगन में ॥२८॥

महिका यानी मलकाठों के,
 साफ-साफ मतलब जानी।
 अनन्त बाबा के आँखी में,
 देखै सब भर-भर पानी ॥२९॥

गामों करौ श्रेष्ठ व्यक्ति तब,
 आबी बाबा सें बोलै।
 बाबा आँसू करौ कारण,
 सबलोगों लेगीं खोलै ॥३०॥

काली मैया वैष्णव छेकै,
इनका आगू बलि देना।
ई तें छेकै महापाप सें,
आफत माथा पर लेना॥३१॥

भैंसा-बकरा काटी-काटी,
पूरा पाप कमाना छै।
ई लोकों सें ऊ लोकों तक,
जीवन में पछताना छै॥३२॥

गौवाँ आबी बोलै बाबा !
बात यहाँ जों मानै छी।
काली मैया के मनसूवा,
हम्में सब नैं जानै छी॥३३॥

भैंसा-बकरा नैं देला पर,
आग बबूला ऊ होतै।
उनको क्रोधों में आबी कें,
छाती पीटी सब रोतै॥३४॥

अभी फुलाइस राखों हमरा,
बलि आगू नैं देना छै।
मैया के मनसूवा अखनी,
सबकें जानी लेना छै॥३५॥

अगर फुलाइस होतै तभिये,
वैष्णव काली मानी कें,
बलिदानों कें सब तुकरैबै,
मन में निश्चय ठानी कें॥३६॥

बाबा गौमूत्रों सें सिंचित,
काली मंदिर कें करलक।
नेम-ठेम सें वहाँ फुलाइस,
मैया के आगू धरलक॥३७॥

होलै अहिनों वहाँ फुलाइस,
सब नाचै झूमी-झूमी।
काली मैया की जयबोलै,
मंदिर कें घूमी-घूमी॥३८॥

बलिदानों के बाते टललै,
जय मैया वैष्णव काली।
मैया के हाथों में अखनी,
सब लोगों के रखवाली॥३९॥

एक वार भण्डारा बाबा,
अपना हाथों सें करलक।
बीस-बीस मन पूड़ी खातिर,
आटा लानी कें धरलक॥४०॥

तइयो लोगों केरों चिन्ता,
भीड़ों के देखी बढ़लै।
बादल उमड़ी-घुमड़ी गरजै,
चिन्ता में सब्भे पड़लै ॥४१॥

पर भंडारा लग पानी के,
एक्को बूँद कहाँ गिरलै।
सब्भैं खैथैं-पीथैं रहलै,
आसन ककरो नैं हिललै ॥४२॥

बचलों सामानों के लेखा,
नैं रहलै कुछ जानी लें।
अभियो हजार लोग खैतियै,
अघैतियै सब मानी लें ॥४३॥

बाबा द्वारा ढेरी जगहाँ,
यज्ञ करैलों गेलों छै।
पर अभाव कोनों चीजों के,
कहियो कुछ नैं भेलों छै ॥४४॥

बाबा के दयनीय अवस्था,
आबी माथा पर नाँचै।
तइयो बाबा घूमी-घूमी,
उपदेशो सगरे बाँचै ॥४५॥

अहिनों हालत में भी बाबा,
घूमें गेलै जब काशी।
स्वास्थ्य बिगड़लै पत्नी केरों,
जे दर्शन के अभिलाषी ॥४६॥

बाबा केरों आसन डोलै,
पत्नी आँखी में आबै।
धीरज राखै लेली बाबा,
अपना मन के समझाबै ॥४७॥

राह घरों के पकड़ी लै छै,
आबै उड़लों गामों में।
लोग उमड़लै दर्शन लेली,
जे-जे फसलों कामों में ॥४८॥

आँगन में जब लात घरलकै,
सब्भैं शीश झुकाबै छै।
आशीर्वादों साथें बाबा,
अपनों झांझ बजाबै छै ॥४९॥

मरनासन पर रहै चौरिया,
उठलै हिम्मत बान्ही के।
पतिदेवों के पैर परवारै,
लोटा-पानी लानी के ॥५०॥

आँचल सेँ पोछै गोड़ों केँ,
 माथों राखै गोड़ों पर।
 रहै चौरिया जीवन केरों,
 खाड़ों अंतिम मोड़ों पर॥५१॥

बिस्तर पर लेटाबै बाबा,
 बोलै 'धर्म परायण छों।'
 तोहीं सीता-सावित्री छों,
 गीता छों, रामायण छों॥५२॥

कहै चौरिया पतिदेवों सेँ,
 अपनाँ हाथें देँ पानी।
 गलती सारा माफ करी देँ,
 हममें छेलों अज्ञानी॥५३॥

पानी पीबी बाबा हाथें,
 देवी स्वर्ग सिधारै छै।
 पाठक कहतै ऊ जग्घा पर,
 के जीतै, के हारै छै॥५४॥

धूम-धाम सेँ श्राद्धों साथें,
 रामधुनी करबाबै छै।
 रही चौरिया सदा सुहागिन,
 समुचित सद्गति पाबै छै॥५५॥



सर्ग-ग्यारह

रूग्न अवस्था बाबा केरों,
 कामों के नैं अंत।

मोंन रमाबै जनहित में नित,
 अहिनों बाबा संत॥१॥

चलै पुर्णियाँ के नवहट्टा,
 थर-थर करै शरीर।

तिनटंगा के ठाकुरबाड़ी,
 में कुछ हुवै अधीर॥२॥

देहों में ताकत नैं रहलै,
 उठै जरा नैं गोड़।

लाचार करै कुछ दर्द बढ़ी,
 जहाँ-जहाँ पर मोड़॥३॥

सेवक सब बाबा केँ लेनें,
 बिन्दा दीरा जाय।

कल्याण टोला में आदमी,
 केँ देलक गच्छाय॥४॥

दर्शन लेली लोग उमड़लै,
 बदली गेलै साज।

काल पूर्णिमा कार्तिक केरों,
 चतुर्दशी छै आज॥५॥

कुच्छू दिन आरू जीयै लें,
 लोगों करै उपाय।
 मकरध्वज लानी बाबा कें,
 दै छै वहाँ पिलाय।।६।।

दवा खाय आबै होशों में,
 कार्तिक लागै पार।
 रहै पूर्णिमा दिन बाबा के,
 छोड़ै के संसार।।७।।

बाबा लाठी लें कें दौड़ै,
 तों सब बड़्डी नीच।
 टालें हमरों मृत्यु के तिथि,
 ऐलें हमरा बीच।।८।।

मौन भंग बाबा के होलै,
 नैं रहलै कुछ बोध।
 काम बिगाड़ी देखें छै सब,
 आबी—आबी क्रोध।।९।।

बाबा लगलै रामधुनी में,
 जपतें रहलै नाम।
 भजन—भाव से ही सम्हरै छै,
 बिगड़ै वाला काम।।१०।।

रात पूर्णिमा के ही छेलै,
 चिन्ता सब बेकार।
 बड़ा सबेरे त्यागी गेलै,
 बाबा ई संसार।।११।।

आठ बजे के बाद पैरवा,
 करनें रहै प्रवेश।
 अहिनों संतों पर आश्रित छै,
 हमरों भारत देश।।१२।।

बीस सौ चार विक्रम संवत,
 सदी बीसवीं जान।
 अनुराधा नक्षत्र सुहावन,
 उगलों छेलै भान।।१३।।

रहै शरद ऋतु जाही वाला,
 अब ऐतै हेमंत।
 शीत—लहर उमतैलै जाड़ों,
 जैतै कहाँ तुरंत।।१४।।

उन्नीस नवम्बर सैंतालिस,
 दिन छेलै बुधवार।
 बाबा केरों भव—सागर से,
 नैया होलै पार।।१५।।

ठाकुरबाड़ी के प्रांगन में,
बाबा केरों लाश।
राखी जय—जयकार करै सब,
गूँजै तब आकाश।१६॥

नर—नारी, बच्चा, बूढ़ा के,
ऐलै जब जामात।
होलै बाबा के देहों पर,
फूलों के बरसात।१७॥

शव यात्रा बाबा के अद्भुत,
लम्बा लगभग कोस।
संकीर्तन के बीच—बीचमें,
बाबा के जयघोष।१८॥

पावन भूमि कल्याण टोला,
सें यात्रा प्रारंभ।
धूप—दीप—नैवेद्य चढ़ाना,
भी होलै आरम्भ।१९॥

बरियारपुर बाजार, स्टेशन,
आशा टोला जाय।
चौकों पर सें ठाकुरबाड़ी,
लानै फूँ घुमाय।२०॥

बाबा के कहला अनुसारें,
जन्म—भूमि के पास।
नजदीक केरों गंगा तट पर,
जलना छेलै लाश।२१॥

परम कर्मठ शिष्य जमुनाजी,
द्वारा आरति होय।
वेद ध्वनि, वैदिक मंत्रों सें,
दाह कहै सब कोय।२२॥

गंगा भैया के धारा में,
डाली पूरा भस्म।
दाह—संस्कार केरों सम्भे,
पूरा होलै रश्म।२३॥

काशी जी सें पंडित आबै,
श्राद्ध कार्य लें भाय।
अबधपुरी सें प्रवचनकर्ता,
नीति—धर्म समझाय।२४॥

ऐलै दूर—दराजों सें सब,
सम्प्रदाय के संत।
मंदिर—ठाकुरबाड़ी केरों,
जुटलै यहाँ महंत।२५॥

श्राद्ध कार्य में कोनों त्रुटि नैं,
 ज्ञानी—पंडित साथ।
 भोजों भण्डारा में छेलै,
 साधु—संत के हाथ॥२६॥

नाम—गुणों में जानी लें तों,
 बाबा रहै अनंत।
 गंगोत्री समुदायों करों,
 सूरज लागै अंत॥२७॥

ऐलों—गेलों महंथ द्वारा,
 होलै बड़ा विचार।
 महदेवा ठाकुरबाड़ी के,
 जमुना ऊपर भार॥२८॥

श्री राम—जानकी गंगोत्री,
 ठाकुरबाड़ी खास।
 साहेबगंज, भागलपुर कें,
 थाम्है जमुना दास॥२९॥

उँगराचक, ऋषिकुण्ड समेते,
 सब जग्घों के भार।
 जमुना दासों पर थोपी कें,
 गल्ला डालै हार॥३०॥

ढाई रुपया मन चावल तब,
 बिकै रहै बाजार।
 दू रुपया मन गेहूँ तइयो,
 खर्चा साठ हजार॥३१॥

बाबा करों पुण्यतिथि पर,
 बाजै ढोलक, झाल।
 आयोजन नवरात्र, रामधुन,
 होथैं छै हर साल॥३२॥

बाबा अनंत दास अमर छै,
 अमर करलका काम।
 अहिनें सब संतों के कारण,
 भारत के छै नाम॥३३॥

बाबा अनंत दासों करों,
 देलों जे उपदेश।
 जीवन कें सानन्द बनाबै,
 काटै सबठो क्लेश॥३४॥

प्रातः काल ब्रह्म मुहुर्त में,
 जागों पहला कर्म।
 नित पूजा, ध्यान आराधना,
 करना समझों धर्म॥३५॥

पर धन कें पत्थर मानी लें,
थोड़ों में संतोष।
घातक छै सबै के लेली,
सदा खजाना—कोष॥३६॥

धर्म कार्य में तत्पर रहना,
त्यागी अत्याचार।
जीवन कें ही नर्क बनाबै,
लूट—पाट व्यभिचार॥३७॥

जीवन कें ही नष्ट करै छै,
अहंकार—अभिमान।
अभिमानी से दूर रहै छै,
दुनिया में भगवान॥३८॥

बाबा के उपदेश उतारों,
जीवन में सबलोग।
स्वस्थ रहै के लेली नितदिन,
करों ध्यान—तप—योग॥३९॥

अनंत बाबा के जय बोलों,
जय—जय भारत देश।
साधु—संत, ऋषि—मुनि के दाता,
हमरों अंग प्रदेश॥४०॥



हीरा प्रसाद 'हरेन्द्र' : एक परिचय

जन्म : 06/09/1950, कटहरा, सुलतानगंज, (भागलपुर)

सम्मान/पुरस्कार/उपाधि:

1. डॉ० अम्बेदकर फेलोशिप, राष्ट्रीय सम्मान (05/12/2001)
(दलित साहित्य अकादमी, दिल्ली)
2. खूब लाल महतो स्मृति पुरस्कार (उत्तम हमरों अंग लेली)
(अ० मा० अंगिका साहित्य कला मंच) (09/06/2001)
3. जगदीश पाठक मधुकर— कुल विभाकर (05/05/2002)
(समय साहित्य सम्मेलन, पुनरिया, बाँका)
4. इन्दिरा देवी स्मृति सम्मान (12/08/2003) (बरियारपुर, मुंगेर)
5. जनार्दन बाबू रजत स्मृति सम्मान (08-09/11/2003)
(अ० मा० अंगिका साहित्य कला मंच, खगड़िया)
6. पंडित गोपी नाथ तिवारी पुरस्कार (25/12/2005)
जाहनवी अंगिका संस्कृति संस्थान, पटना
7. सरला स्मृति साहित्यकार सम्मान (अंगप्रिया के सफल सम्पादन लेली)
जानकीपुर पबई (बाँका) (09/12/2007)
8. गोपाल प्रसाद सिंह सेवा निवृत्त प्र० अ० स्मृति सम्मान
(बाबा दूबे भयहरण स्थान सलेमपुर, अमरपुर (बाँका) 8 मार्च 2008)
9. भारतेन्दु हरिश्चन्द्र रजत स्मृति सम्मान ('ठकहरा' लेली) (15/06/2008)
(हिन्दी भाषा साहित्य परिषद्, खगड़िया)
10. पंडित जगदीश पाठक मधुकर, काव्य साहित्य साधना स्मृति सम्मान
(भागलपुर प्रमण्डलीय अ० भारतीय भाषा साहित्य सम्मेलन)
11. स्व० वैकुण्ठ विहारी स्मृति सम्मान (तारापुर, मुंगेर)
12. राहुल सांकृत्यायण स्मृति सम्मान (21 फरवरी 2010)
अन्तर्राज्य सदभावना बहु—भाषी काव्योत्सव, उद्याडीह, भागलपुर
13. आदिकवि सरहपा स्मृति सम्मान (11 अप्रैल 2010)
अ.भा. अंगिका साहित्य कला मंच सरहपापुरम्, कहलगाँव
14. जय प्रकाश मोदी स्मृति सम्मान (14 मार्च 2011)
कवि रत्न (विक्रमशिला हिन्दी विद्यापीठ)
15. हास्य शिरोमणि सम्मान। 9.5.13 महादेवपुर (अमरपुर) बाँका।
16. भगीरथ बाबा अंग साहित्य सम्मान। 01.02.2014,
अखिल भारतीय अंगिका साहित्य विकास समिति
17. माहताब अली रजत स्मृति सम्मान। 09.03.2014
भावांजलि लेली, हिन्दी भाषा साहित्य परिषद् खगड़िया।
18. उमानाथ पाठक स्मृति सम्मान। 30.03.2014
अजगवी नाथ साहित्य मंच, सुलतानगंज

19. गौतम बुद्ध राष्ट्रीय सम्मान 2019
राजगीर महोत्सव, राजगीर (बिहार)
20. तिलका मांझी राष्ट्रीय सम्मान 2019
अंग मदद फाउण्डेशन, तुलसी मिश्र लेन (चंपानगर)
 1. कवि रत्न (विक्रमशिला हिन्दी विद्यापीठ)
 2. अंग श्री (अ० भा० भाषा साहित्य सम्मेलन प्रमंडलीय शाखा, भागलपुर)
 3. अंग श्री (क्षेत्रीय सर्वभाषा कवि सम्मेलन, खड़िया, मुंगेर)
 4. साहित्य श्री (अ० भा० भाषा साहित्य सम्मेलन, भोपाल)
 5. साहित्य रत्न (मंगनी लाल स्मृति ट्रस्ट, बाँसी, बाँका)
 6. अंग शिरोमणि (राज्य स्तरीय सर्व भाषा सद्भावना काव्योत्सव, उधाडीह, भागलपुर)
 7. कवि शिरोमणि (विक्रमशिला हिन्दी विद्यापीठ, गाँधीनगर, ईशीपुर, भागलपुर)
8. पंचशील शिरोमणि (पंचशील चैरिटेबुल सोसायटी, 25/4 कड़कड दुम्म एरिया, सेंट्रल बैंक के ऊपर, नई दिल्ली 110 092-भारत)
9. अंग-पतंग (अ०भा० अंगिका साहित्य सम्मेलन, जिला शाखा-भागलपुर)
10. अंगिका सपूत (अ०भा० अंगिका साहित्य कला मंच प्रखण्ड शाखा-शंभुगंज)
11. महाकवि- (विक्रमशिला हिन्दी विद्या पीठ)
12. अंग सपूत (23/10/2016)
सर्वांगीण विकास परिषद् झारखण्ड राज्यान्तर्गत के० का० ऊर्जा नगर, महागामा
13. साहित्य रत्न 26 जनवरी 2020
क्रांतिशील बुद्धिजीवी साहित्यमंच बरियारपुर (मुंगेर)
प्रशस्ति (ढेर साहित्यिक संस्था द्वारा)
देश-विदेश के स्तरीय पत्रिका में रचना प्रकाशित आरु आकाशवाणी भागलपुर तथा दूरदर्शन पटना से अंगिका आरु हिन्दी रचना संप्रसारित
शैली-विसंगति में हास्य खोजी कें व्यंग्य प्रहार करना।
महामंत्री- अखिल भारतीय अंगिका साहित्य कला मंच।
सम्प्रति-सम्पादक- मंजिल / अंगप्रिया/देवायतन
सम्पर्क - ग्राम+पो०-कटहरा, सुलतानगंज (भागलपुर)-813213

मो०-9931854246

बाबा अनंत दास/हरेन्द्र